

南齊書

函一
八册
函

南齊書
函一
八册
函

PD

同治十三年冬
金陵書局印行

南齊書目錄

本紀第一

南齊書一

高帝上

姓蕭氏諱道成

本紀第二

南齊書二

高帝下

本紀第三

南齊書三

武帝

諱曠

本紀第四

南齊書四

鬱林王

諱昭崇

本紀第五

南齊書五

海陵王

諱昭文

本紀第六

南齊書六

明帝

諱鸞

本紀第七

南齊書七

東昏侯

諱寶卷

本紀第八

南齊書八

和帝

諱寶融

志第一

南齊書九

禮上

志第二

南齊書十

禮下

志第三

南齊書十一

樂

志第四

南齊書十二

天文上

志第五

南齊書十三

天文下

志第六

南齊書十四

州郡上

志第七

南齊書十五

州郡下

志第八

南齊書十六

百官

志第九

南齊書十七

輿服

志第十

南齊書十八

祥瑞

志第十一

南齊書十九

五行

列傳第一

南齊書二十

皇后

宣孝陳皇后

高昭劉皇后

武穆裴皇后

文安王皇后

鬱林王何妃

海陵王王妃

明敬劉皇后

東昏褚皇后

和帝王皇后

列傳第二

南齊書二十一

文惠太子

列傳第三

南齊書二十二

豫章文獻王

列傳第四

南齊書二十三

褚淵淵弟澄
徐嗣

王儉

列傳第五

南齊書二十四

柳世隆

張瓌

列傳第六

南齊書二十五

垣崇祖

張敬兒

列傳第七

南齊書二十六

王敬則

陳顯達

列傳第八

南齊書二十七

劉懷珍

李安民

王玄載

弟玄邈

列傳第九

南齊書二十八

崔祖思

劉善明

蘇侃

垣榮祖

列傳第十

南齊書二十九

呂安國

全景文

周山圖

周盤龍

王廣之

列傳第十一

南齊書三十

薛淵

戴僧靜

桓康

焦度

曹虎

列傳第十二

南齊書三十一

江謐

荀伯玉

列傳第十三

南齊書三十

王琨

張岱

褚炫

何戢

王延之

阮韜

列傳第十四

南齊書三十三

王僧虔

張緒

列傳第十五

南齊書三十四

虞玩之

劉休

沈沖

庾杲之

王湛

列傳第十六

南齊書三十五

高祖十二王

臨川獻王映

長沙威王晃

武陵昭王暉

安城恭王暕

鄱陽王鏘

桂陽王鑠

始興簡王鑑

江夏王鋒

南平王銳

宜都王鏗

晉熙王鉞

河東王鉉

列傳第十七

南齊書三十六

謝超宗

劉詳

列傳第十八

南齊書三十七

劉撝

劉悛

虞綜

胡諧之

列傳第十九

南齊書三十八

蕭景先

蕭赤斧

子穎胄

列傳第二十

南齊書三十九

劉瓛

弟璠

陸澄

列傳第二十一

南齊書四十

武帝一十七王

竟陵文宣王子良

子昭胄

廬陵王子卿

魚復侯子響

安陸王子敬

晉安王子懋

隨郡王子隆

建安王子真

西陽王子明

南海王子罕

巴陵王子倫

邵陵王子貞

臨賀王子岳

西陽王子文

衡陽王子峻

南康王子琳

湘東王子建

南郡王子夏

列傳第二十二

南齊書四十一

張融

周顒

列傳第二十三

南齊書四十二

王晏

蕭湛

蕭坦之

江祐

列傳第二十四

南齊書四十三

江斡

何昌寓

謝瀛

王思遠

列傳第二十五

南齊書四十四

徐孝嗣

沈文季

列傳第二十六

南齊書四十五

宗室

衡陽元王道度

始安貞王道生

遙光
遙昌

遙放

安陸昭王緬

列傳第二十七

南齊書四十六

王秀之

王慈

蔡約

陸慧曉

顧憲之

蕭惠基

列傳第二十八

南齊書四十七

王融

謝朓

列傳第二十九

南齊書四十八

袁彖

孔稚珪

劉繪

列傳第三十

南齊書四十九

王奐

從弟績

張沖

列傳第三十一

南齊書五十

文二王

巴陵王昭秀

桂陽王昭粲

明七王

巴陵隱王寶義

江夏王寶玄

廬陵王寶源

邵陽王寶寅

邵陵王寶攸

晉熙王寶嵩

桂陽王寶貞

列傳第三十二

南齊書五十一

裴叔業

崔慧景

張欣泰

列傳第三十三

南齊書五十二

文學

丘靈鞠

檀超

卞彬

丘巨源

王智深

陸厥

崔慰祖

王遠之

祖沖之

賈淵

列傳第三十四

南齊書五十三

夏政

傅琰

虞愿

劉懷慰

裴昭明

沈憲

李珪之

孔琇之

列傳第三十五

南齊書五十四

高逸

褚伯玉

明僧紹

顧歡

臧榮緒

何求

劉虯

庾易

宗測

杜京產

沈麟士

吳苞

徐伯珍

列傳第三十六

南齊書五十五

孝義

崔懷慎

公孫僧遠

吳欣之

韓係伯

孫淡

華寶

韓靈敏

封延伯

吳達之

王文殊

朱謙之

蕭叡明

樂頤

江泌

杜栖

陸絳

列傳第三十七

南齊書五十六

倖臣

紀僧真

劉係宗

茹法亮

呂文顯

呂文度

列傳第三十八

南齊書五十七

魏虜

列傳第三十九

南齊書五十八

蠻

東南夷

列傳第四十

南齊書五十九

芮芮虜

河南氏羌

南齊書八紀十一志四十列傳合五十九篇梁蕭子顯撰始江淹已爲十志沈約又爲齊紀而子顯自表武帝別爲此書臣等因校正其訛謬而敘其篇目曰將以是非得失興壞理亂之故而爲法

戒則必得其所託而後能傳於久此史之所以作也然而所託不
得其人則或失其意或亂其實或析理之不通或設辭之不善故
雖有殊功臚德非常之迹將闕而不章鬱而不發而檮杌鬼瑣姦
回凶慝之形可幸而掩也嘗試論之古之所謂良史者其明必足
以周萬事之理其道必足以適天下之用其智必足以通難知之
意其文必足以發難顯之情然後其任可得而稱也何以知其然
邪昔者唐虞有神明之性有微妙之德使由之者不能知知之者
不能名以爲治天下之本號令之所布法度之所設其言至約其
體至備以爲治天下之具而爲二典者推而明之所記者豈獨其
迹邪并與其深微之意而傳之小大精粗無不盡也本末先後無
不白也使誦其說者如出乎其時求其指者如卽乎其人是可不
謂明足以周萬事之理道足以適天下之用智足以通難知之意

文足以發難顯之情者乎則方是之時豈特任政者皆天下之士
哉蓋執簡操筆而記之者亦皆聖人之徒也兩漢以來爲史者去之
遠矣司馬遷從五帝三王旣歿數千載之後秦火之餘因散絕殘
脫之經以及傳記百家之說區區掇拾以集著其善惡之迹興廢
之端又創己意以爲本紀世家八書列傳之文斯亦可謂奇矣然
而蔽害天下之聖法是非顛倒而采摭謬亂者亦豈少哉是豈可
不謂明不足以周萬事之理道不足以適天下之用智不足以通
難知之意文不足以發難顯之情者乎夫自三代以後爲史者如
遷之文亦不可不謂雋偉拔出之材非常之士也然顧以謂明不
足以周萬事之理道不足以適天下之用智不足以通難知之意
文不足以發難顯之情者何哉蓋聖賢之高致遷固有不能純達
其情而見之於後者矣故不得而與之也遷之得失如此況其他

邪至於宋齊梁陳後魏後周之書蓋無以議爲也子顯之於斯文
喜自馳騁其更改破析刻雕藻績之變尤多而其文益下豈夫材
固不可以強而有邪數世之史旣然故其事迹曖昧雖有隨世以
就功名之君相與合謀之臣未有赫然得傾動天下之耳目播天
下之口者也而一時儉奪傾危悖理反義之人亦幸而不暴著於
世豈非所託不得其人故邪可不惜哉蓋史者所以明夫治天下
之道也故爲之者亦必天下之材然後其任可得而稱也豈可忽
哉臣恂臣寶臣臣穆臣藻臣洙臣覺臣彥若臣鞏謹序目錄昧死
上

南齊書卷一

本紀第一

高帝上

太祖高皇帝諱道成字紹伯姓蕭氏小諱鬪將漢相國蕭何二十四世孫也何子鄼定侯延生侍中彪彪生公府掾章章生皓皓生仰仰生御史大夫望之望之生光祿大夫育育生御史中丞紹紹生光祿勳閎閎生濟陰太守闡闡生吳郡太守永永生中山相苞苞生博士周周生蛇虵長矯矯生州從事遠遠生孝廉休休生廣陵府丞豹豹生太中大夫裔裔生淮陰令整整生卽丘令儁儁生輔國參軍樂子宋昇明二年九月贈太常生皇考蕭何居沛侍中彪免官居東海蘭陵縣中都鄉中都里晉元康元年分東海爲蘭陵郡中朝亂淮陰令整字公齊過江居晉陵武進縣之東城里寓

居江左者皆僞置本土加以南名於是爲南蘭陵蘭陵人也皇考諱承之字嗣伯少有大志才力過人宗人丹陽尹摹之北兗州刺史源之竝見知重初爲建威府參軍義熙中蜀賊譙縱初平皇考遷揚武將軍安固汶山二郡太守善於綏撫元嘉初徙爲威烈將軍濟南太守七年右將軍到彥之北伐大敗虜乘勝破青部諸郡國別帥安平公乙旃眷寇濟南皇考率數百人拒戰退之虜眾大集皇考使偃兵開城門眾諫曰賊眾我寡何輕敵之甚皇考曰今日懸守窮城事已危急若復示弱必爲所屠惟當見彊待之耳虜疑有伏兵遂引去青州刺史蕭思話欲委鎮保險皇考固諫不從思話失據潰走明年征南大將軍檀道濟於壽張轉戰班師滑臺陷沒兗州刺史竺靈秀抵罪宋文帝以皇考有全城之功手書與都督長沙王義欣曰諱北雍本理民直亦不在武幹後今擬爲兗

州刺史檀征南詳之皇考與道濟無素故事遂寢遷輔國鎮北中
兵參軍員外郎十年蕭思話爲梁州刺史皇考爲其橫野府司馬
漢中太守氏帥楊難當寇漢川梁州刺史甄法護棄城走思話至
襄陽不進皇考輕軍前行政氏僞魏興太守薛健於黃金山剋之
黃金山張魯舊戍南接漢川北枕驛道險固之極健旣潰散皇考
卽據之氏僞梁秦二州刺史趙溫先據州城聞皇考至退據小城
薛健退屯下桃城立柴營皇考引軍與對壘相去二里健與僞馮
翊太守蒲旱子悉力出戰皇考大破之健等閉營自守不敢出思
話繼至賊乃稍退皇考進至峨公山爲左衛將軍沙州刺史呂平
大眾所圍積日建武將軍蕭汪之平西督護段蚪等至表裏奮擊
大破之難當又遣息和領步騎萬餘人夾漢水兩岸援趙溫攻逼
皇考相拒四十餘日賊皆衣犀甲刀箭不能傷皇考命軍中斷梁

長數尺以大斧搥其後賊不能當乃焚營退皇考追至南城眾軍

自後而進連戰皆捷梁州平詔曰諱北雍本稟命先驅蒙險深入

全軍屢剋奮其忠果可龍驤將軍隨府轉寧朔司馬太守如故入

爲太子屯騎校尉文帝以平氐之勞青州缺將欲授用彭城王義

康秉政皇考不附乃轉爲江夏王司徒中兵參軍龍驤將軍南秦

山太守封晉興縣五等男邑三百四十戶遷右軍將軍元嘉二十

四年殂年六十四梁土民思之於峨公山立廟祭祀昇明二年贈

散騎常侍金紫光祿大夫太祖以元嘉四年丁卯歲生姿表英異

龍顙鍾聲鱗文遍體儒士雷次宗立學於雞籠山太祖年十三受

業治禮及左氏春秋十七年宋大將軍彭城王義康被黜鎮豫章

皇考領兵防守太祖舍業南行十九年竟陵蠻動文帝遣太祖領

偏軍討沔北蠻二十一年伐索虜至丘檻山竝破走二十三年雍

州刺史蕭思話鎮襄陽啟太祖自隨戍河北討樊鄧諸山蠻破其聚落初爲左軍中兵參軍二十七年索虜圍汝南戍主陳憲臺遣靈朔將軍臧質安蠻司馬劉康祖救之文帝使太祖宣旨授節度聞虜主拓跋燾向彭城質等回軍救援至盱眙太祖與質別軍主胡宗之等五軍步騎數千人前驅燾已潛過淮卒相遇於筦山下合戰敗績緣淮奔退宗之等皆陷沒太祖還就質固守爲虜所攻圍甚危急事靈還京師二十九年領偏軍征仇池梁州西界舊有武興戍晉隆安中沒屬氏武興西北有蘭臯戍去仇池二百里太祖擊二壘皆破之遂從谷口入關未至長安八十里梁州刺史劉秀之遣司馬馬注助太祖攻談堤城拔之虜僞河閒公奔走虜救兵至太祖軍力疲少又聞文帝崩乃燒城還南鄭襲爵晉興縣五等男孝建初除江夏王大司馬參軍隨府轉太宰遷員外郎直閤

中書舍人西陵王撫軍參軍建康令新安王子鸞有盛寵簡選僚佐爲北軍中郎中兵參軍陳太后憂起爲武烈將軍復爲建康令中兵如故景和世除後軍將軍值明帝立爲右軍將軍時四方反叛會稽太守尋陽王子房及東諸郡皆起兵明帝加太祖輔國將軍率眾東討至晉陵與賊前鋒將程杲孫曇瓘等戰一日破賊十二壘分軍定諸縣晉陵太守袁標棄城走東境諸城相繼奔散徐州刺史薛安都反彭城從子索兒寇淮陰山陽太守程天祚舉城叛徐州刺史申令孫又降徵太祖討之時太祖平東賊還又將南討出次新亭前軍已發而索兒自睢陵渡淮馬步萬餘人擊殺臺軍主孫耿縱兵逼前軍張永營告急明帝聞賊渡遽追太祖往救之屯破釜索兒向鍾離永遣盩朔將軍王寬據盱眙遏其歸路索兒擊破臺軍主高道慶走之於石鼈將西歸王寬與軍主任農夫

先據白鵠澗張永遣太祖馳督寬索兒東要擊太祖使不得前太祖鼓行結陣直入寬壘索兒望見不敢發經數日索兒引軍頓石梁太祖追之至葛冢候騎還云賊至太祖乃頓軍引管分兩馬軍夾營外以待之俄頃賊馬步奄至又推火車數道攻戰相持移日乃出輕兵攻賊西使馬軍合擊其後賊眾大敗追奔獲其器仗進屯石梁澗北索兒夜遣千人來斫營營中驚太祖臥不起宣令左右案部不得動須臾賊散太祖議欲於石梁西南高地築壘通南道斷賊走路索兒果來爭之太祖率軍擊破之賊馬自相踐藉死索兒走向鍾離太祖追至黯黹而還除驍騎將軍封西陽縣侯邑六百戶遷巴陵王衛軍司馬隨鎮會稽江州刺史晉安王子勳遣臨川內史張淹自鄱陽嶠道入三吳臺軍主沈思仁與僞龍驤將軍任皇鎮西參軍劉越緒各據險相守明帝遣太祖領三千人討

之時朝廷器甲皆充南討太祖軍容寡闕乃編椳皮爲馬具裝析竹爲寄生夜舉火進軍賊望見恐懼未戰而走還除桂陽王征北司馬南東海太守行南徐州事初明帝遣張永沈攸之以眾喻降薛安都謂太祖曰吾今因此北討卿意以爲何如太祖對曰安都才識不足狡猾有餘若長轡緩御則必遣子入朝今以兵逼之彼將懼而爲計恐非國之利也帝曰眾軍猛銳何往不剋卿每杖策幸勿多言安都見兵至果引索虜永等敗於彭城淮南孤弱以太祖爲假冠軍將軍持節都督北討前鋒諸軍事鎮淮陰泰始三年沈攸之吳喜北敗於睢口諸城戍大小悉奔歸虜遂進至淮北圍角城戍主賈法度力弱不敵諸將勸太祖渡岸救之太祖不許遣軍主高道慶將數百張弩浮艦淮中遙射城外虜弩一發斃百箭俱去虜騎相引避之乃命進戰城圍卽解遷督南兗徐二州諸軍

事南兗州刺史持節假冠軍督北討如故五年進督青冀三州

六年除黃門侍郎領越騎校尉不拜復授冠軍將軍留本任明帝

常嫌太祖非人臣相而民間流言云蕭諱北雅本當爲天子明帝

作道成

愈以爲疑遣冠軍將軍吳喜以三千人北使令喜留軍破釜自持

銀壺酒封賜太祖太祖戎衣出門迎卽酌飲之喜還帝意乃悅七

年徵還京師部下勸勿就徵太祖曰諸卿闇於見事主上自誅諸

弟爲太子稚弱作萬歲後計何關佗族惟應速發事緩必見疑今

骨肉相害自非靈長之運禍難將興方與卿等戮力耳拜散騎常

侍太子左衛率時世祖以功當別封顛縣太祖以一門二封固辭

不受詔許之會邑二百戶明帝崩遣詔爲右衛將軍領衛尉加兵

五百人與尚書令袁粲護軍褚淵領軍劉劭共掌機事又別領東

北選事尋解衛尉加侍中領石頭戍軍事明帝誅戮蕃戚江州刺

五

史桂陽王休範以人凡獲全及蒼梧王立更有窺伺覬望密與左
右闡人於後堂習馳馬招聚士眾元徽二年五月舉兵於尋陽收
略官民數日得士眾二萬人騎五百匹發盆口悉乘商旅船艦大
雷戍主杜道欣鵠頭戍主劉訾期告變朝廷惶駭太祖與護軍褚
淵征北張永領軍劉劭僕射劉秉游擊將軍戴明寶驍騎將軍阮
佃夫右軍將軍王道隆中書舍人孫千齡員外郎楊運長集中書
省計議莫有言者太祖曰昔上流謀逆皆因淹緩至於覆敗休範
必遠懲前失輕兵急下乘我無備今應變之術不宜念遠若偏師
失律則大沮眾心宜頓新亭白下堅守宮掖東府石頭以待賊千
里孤軍後無委積求戰不得自然瓦解我請頓新亭以當其鋒征
北可以見甲守白下中堂舊是置兵地領軍宜屯宣陽門爲諸軍
節度諸貴安坐殿中右軍諸人不須競出我自前驅破賊必矣因

索筆下議竝注同中書舍人孫千齡與休範有密契獨曰宜依舊遣軍據梁山魯顯聞右衛若不出白下則應進頓南州太祖正色曰賊今已近梁山豈可得至新亭既是兵衝所以欲死報國耳常日乃可屈曲相從今不得也座起太祖顧謂劉劭曰領軍已同鄙議不可改易乃單車白服出新亭加太祖使持節都督征討諸軍事平南將軍加鼓吹一部治新亭城壘未畢賊前軍已至太祖方解衣高臥以安眾心乃索白虎幡登西垣使盛朔將軍高道慶羽林監陳顯達員外郎王敬則浮舸與賊水戰自新林至赤岸大破之燒其船艦死傷甚眾賊步上新林太祖馳使報劉劭急開大小桁撥淮中船舫悉渡北岸休範乘肩輿率眾至壘南上遣盛朔將軍黃回馬軍主周盤龍將步騎出壘對陣休範分兵攻壘東短兵接戰自巳至午眾皆失色太祖曰賊雖多而亂尋破也楊運長領

三齊射手七百人引彊命中故賊不得逼城未時張敬兒斬休範
首太祖遣隊主陳靈寶送首還臺靈寶路中遇賊軍埋首道側臺
軍不見休範首愈疑懼賊眾亦不知休範已死別率杜黑蠡急攻
壘東司空主簿蕭惠領數百人突入東門叫噪至堂下城上守門
兵披退太祖挺身上馬率數百人出戰賊皆推楯而前相去數丈
分兵橫射太祖引滿將發左右將戴仲緒舉楯扞之箭應手飲羽
傷百餘人賊死戰不能當乃却眾軍復得保城與黑蠡拒戰自晡
達明旦矢石不息其夜大雨鼓叫不復相聞將士積日不得寢食
軍中馬夜驚城內亂走太祖秉燭正坐厲聲呵止之如此者數四
賊帥丁文豪設伏破臺軍於阜茨橋直至朱雀桁劉勔欲開桁王
道隆不從勔及道隆竝戰沒初勔高尚其意託造園宅名爲東山
頗忽世務太祖謂之曰將軍以顧命之重任兼內外主上春秋未

幾諸王竝幼冲上流聲議遐邇所聞此是將軍艱難之日而將軍深尙從容廢省羽翼一朝事至雖悔何追勗竟不納賊進至杜姥宅車騎典籤茅恬開東府納賊冠軍將軍沈懷明於石頭奔散張永潰於白下宮內傳新亭亦陷太祖執蒼梧王手泣曰天下敗矣太祖遣軍主陳顯達任農夫張敬兒周盤龍等從石頭濟淮間道從承明門入衛宮闕休範旣死典籤許公與詐稱休範在新亭土庶惶惑詣壘投名者千數太祖隨得輒燒之乃列兵登城北謂曰劉休範父子先昨皆已卽戮屍在南岡下身是蕭平南諸君善見觀君等名皆已焚除勿有懼也臺分遣眾軍擊杜姥宅宣陽門諸賊皆破平之太祖振旅凱入百姓緣道聚觀曰全國家者此公也太祖與袁粲褚淵劉秉引咎解職不許遷散騎常侍中領軍都督南兗徐兗青冀五州軍事鎮軍將軍南兗州刺史持節如故進爵

爲公增邑二千戶太祖欲分其功請益粲等戶更日入直決事號
爲四貴秦時有太后穰侯涇陽高陵君稱爲四貴至是乃復有焉
四年加太祖尙書左僕射本官如故休範平後蒼梧王漸行凶暴
南徐州刺史建平王景素少有令譽朝野歸心景素亦潛爲自全
之計布款誠於太祖太祖拒而不納七月羽林監袁祗奔景素便
舉兵太祖出屯玄武湖遣眾軍北討事平乃還太祖威名旣重蒼
梧王深相猜忌幾加大禍陳太妃罵之曰蕭諱北雍本作道成有功於國

今若害之後誰復爲汝著力者乃止太祖密謀廢立五年七月戊

子帝微行出北湖常單馬先走羽儀禁衛隨後追之於堤塘相蹈
藉左右張互兒馬墜湖帝怒取馬置光明亭前自馳騎刺殺之因
共屠割與左右作羌胡伎爲樂又於蠻岡賭跳際夕乃還仁壽殿
東阿甕屋中寢語左右楊玉夫伺織女度報我時殺害無常人懷

危懼王夫與其黨陳奉伯等二十五人同謀於甍屋中取千牛刀殺蒼梧王稱敕使廂下奏伎因將首出與王敬則敬則送太祖太祖夜從承明門乘常所騎赤馬入殿內驚怖既知蒼梧王死咸稱萬歲及太祖踐阼號此馬爲龍驤將軍世謂爲龍驤赤明日太祖戎服出殿庭槐樹下召四貴集議太祖謂劉秉曰丹陽國家重感今日之事屬有所歸秉讓不當太祖次讓袁粲粲又不受太祖乃下議備法駕詣東城迎立順帝於是長刀遮粲秉等各失色而去甲午太祖移鎮東府與袁粲褚淵劉秉各甲仗五十人入殿丙申進位侍中司空錄尙書事驃騎大將軍持節都督刺史如故封竟陵郡公邑五千戶給油幢絡車班劔三十人太祖固辭上命卽驃騎大將軍開府儀同三司庚戌進督南徐州刺史封楊玉夫等二十五人爵邑各有差十月戊辰又進督豫司二州初荊州刺史沈

攸之與太祖於景和世同直殿省申以歡好以長女義興公主妻攸之第三子元和攸之爲郢州值明帝晚運陰有異圖自郢州遷爲荊州聚斂兵力將吏逃亾輒討質鄰伍養馬至二千餘匹皆分賦戍邏將士使耕田而倉廩財悉充倉儲荊州作部歲送數千人仗攸之割留簿上供討四山蠻裝治戰艦數百千艘沈之靈溪裏錢帛器械巨積朝廷畏之高道慶家在華容假還過江陵道慶素便馬攸之與宴飲於聽事前合馬樂道慶槩中破攸之馬鞍攸之怒索刃槩道慶馳馬而出還都說攸之反狀請三千人襲之朝議慮其事難濟太祖又保持不許太祖旣廢立遣攸之子司徒左長史元琰賣蒼梧王諸虐害器物示之攸之未得卽起兵乃上表稱慶并與太祖書推功攸之有素書十數行常韜在襖襠角云是明帝與己約誓十二月遂舉兵其妾崔氏許氏諫攸之曰官年已老

那不爲百口計攸之指襖襠角示之稱太后令召已下都京師恐
懼乙卯太祖入居朝堂命諸將西討平西將軍黃回爲都督前驅
前湘州刺史王蘊太后兄子少有膽力以父指名宦不達欲以將
途自奮每撫刀曰龍淵太阿汝知我者叔父景文誡之曰阿答汝
滅我門戶蘊曰答與童烏貴賤覺異童烏景文子絢小字荅蘊小
字也蘊遭母喪罷任還至巴陵停舟一月日與攸之密相交構時
攸之未便舉兵蘊乃下達郢州世祖爲郢州長史蘊期世祖出弔
因作亂據郢城世祖知之不出蘊還至東府前又期太祖出太祖
又不出弔再計不行外謀愈固司徒袁粲尙書令劉秉見太祖威
權稍盛慮不自安與蘊及黃回等相結舉事殿內宿衛主帥無不
協同攸之反問初至太祖往石頭與粲謀議粲稱疾不相見剋王
申夜起兵據石頭劉秉恇怯晡時從丹陽郡載婦女入石頭朝廷

不知也其夜丹陽丞王遜告變秉從弟領軍韜及直閣將軍卜伯
興等嚴兵爲內應太祖命王敬則於宮內誅之遣諸將攻石頭王
蘊將數百精手帶甲赴粲城門已閉官軍又至乃散眾軍攻石頭
斬粲劉秉走雒檐湖蘊逃鬪場竝禽斬之粲位任雖重無經世之
略疏放好酒步履白楊郊野閒道遇一士大夫使呼與酣飲明日
此人謂被知顧到門求通粲曰昨飲酒無偶聊相要耳竟不與相
見嘗作五言詩云訪迹雖中宇循寄乃滄州蓋其志也劉秉少以
宗室清謹見知孝武世秉弟遐坐通嫡母殷氏養女殷舌中血出
眾疑行毒害孝武使秉從弟祗諷秉啟證其事秉曰行路之人尙
不應爾今日迺可一門同盡無容奉敕眾以此稱之故爲明帝所
任蒼梧廢秉出集議於路逢弟韞韞開車迎問秉曰今日之事固
當歸兄邪秉曰吾等已讓領軍矣韞槌胷曰君肉中詎有血粲典

籤莫嗣祖知粲謀太祖召問嗣祖袁謀反何不啟聞嗣祖曰事主義無二心雖死不敢泄也蘊嬖人張承伯藏匿蘊太祖竝赦而用之黃回頓新亭聞石頭鼓噪率兵來赴之朱雀桁有戍軍受節度不聽夜過會石頭已平因稱救援太祖知而不言撫之愈厚遣回西上流涕告別太祖屯閱武堂馳結軍旅閏月辛丑詔假黃鉞率大眾出屯新亭中興堂治嚴築壘教曰河南稱慈諒由掩骼廣漢流仁實存殯朽近表製茲營崇溝浚塹古墟曩隧時有湮移深松茂草或致刊薙憑軒動懷巡墮增愴宜竝爲收改葬并設薄祀二年正月沈攸之攻郢城不剋眾潰自經死傳首京邑丙子太祖旋鎮東府二月癸未進太祖太尉增封三千戶都督南徐南兗徐兗青冀司豫荆雍湘郢梁益廣越十六州諸軍事太祖解驃騎辭都督不許乃表送黃鉞三月己酉增班劔爲四十八人甲仗百人入殿

丙子加羽葆鼓吹餘竝如故辛卯太祖誅鎮北將軍黃回大明泰
始以來相承奢侈百姓成俗太祖輔政罷御府省二尙方諸飾玩
至是又上表禁民間華僞雜物不得以金銀爲箔馬乘具不得金
銀度不得織成繡裙道路不得著錦履不得用紅色爲檐蓋衣服
不得翦綵帛爲雜花不得以綾作雜服飾不得作鹿行錦及局腳
檉柏牀牙箱籠雜物綵帛作屏鄣錦緣薦席不得私作器仗不得
以七寶飾樂器又諸雜漆物不得以金銀爲花獸不得輒鑄金銅
爲像皆須墨敕凡十七條其中宮及諸王服用雖依舊例亦請詳
衷九月丙午進位假黃鉞都督中外諸軍事太傅領揚州牧劔履
上殿入朝不趨贊拜不名置左右長史司馬從事中郎椽屬各四
人使持節太尉驃騎大將軍錄尙書南徐州刺史如故固辭詔遣
敦勸乃受黃鉞辭殊禮甲寅給三望車三年正月乙巳太祖表蠲

百姓逋負丙辰加前部羽葆鼓吹丁巳命太傅府依舊辟召丁卯
給太祖甲仗五百人出入殿省甲午重申前命劔履上殿入朝不
趨贊拜不名三月甲辰詔進位相國總甫揆封十郡爲齊公備九
錫之禮加璽紱遠遊冠位在諸侯王上加相國綠綬綬其驃騎大
將軍揚州牧南徐州刺史如故太祖三讓公卿敦勸固請乃受甲
寅策相國齊公曰天地變通莫大乎炎涼懸象著明莫崇乎日月
嚴冬播氣貞松之操自高光景時昏若華之暎彌顯是故英睿當
亂而不移忠賢臨危而盡節自景和昏虐王綱弛紊太宗受命紹
開中興運屬屯難四郊多壘蕭將軍震威華戎寔資義烈康國濟
民於是乎在朕以不造夙罹閔凶嗣君失德書契未紀威侮五行
虔劉九縣神馱靈繹海水羣飛彝器已塵宗禋誰主綴旒之殆未
足爲譬豈直小宛興刺黍離作歌而已哉天贊皇宋實啟明宰爰

登寡昧纂承大業鴻緒再維闕基重造高勳至德振古絕倫昔保
衡翼殷博陸匡漢方斯蔑如也今將授公典禮其敬聽朕命乃者
袁劉構禍寔繁有徒子房不臣稱兵協亂跨蹈五湖憑陵吳越浮
浸虧辰沈氛晦景桴鼓振於王畿鋒鏑交乎天邑顧瞻宮掖將成
茂草言念邦國翦爲仇讎當此之時人無固志公投袂殉難超然
奮發執金版而先馳登寅車而戒路軍政端嚴卒乘輯睦麾鉞一
臨凶黨冰泮此則霸業之基勤王之始也安都背叛竊據徐方敢
率犬羊陵虐淮潁索兒愚悖同惡相濟天祚無象背順歸逆北鄙
黔黎奄墜塗炭均人廢職邊師告警公受命宗祊精貫朝日擁節
和門氣踰霄漢破釜之捷斬馘蔽野石梁之戰禽其渠帥保境全
民江陽卽序此又公之功也張淹迷昧弗顧本朝受自南區志圖
東夏潛軍間入竊覲不虔于時江服未夷皇塗荐阻公忠誠慷慨

在險彌亮深識九變妙察五色以寡制眾所向風偃朝廷無東顧
之憂閩越有來蘇之慶此又公之功也匈奴野心侵掠疆場前師
失律王旅崩撓灑血成川伏尸千里醜羯俯張勢振彭泗乘勝長
驅窺覲京甸冠帶之軌將湮被髮之容行及公奉辭伐罪戒旦晨
征兵車始交氛祲時蕩弔死撫傷弘宣皇澤俾我淮肥復沾盛化
此又公之功也自茲厥後獫狁孔熾封豕長蛇重窺上國而世故
相仍師出日老戰士無臨陣之心戎卒有懷歸之思是以下邳精
甲望風振恐甬城高壘指日淪陷公眷言王事發憤忘食躬擐甲
膏視險若夷短兵纔接巨猾身散分疆畫界開創青兗此又公之
功也秦始之末入參禁旅任兼軍國事同顧命桂陽負眾輕問九
鼎裂冠毀冕拔本塞源入兵萬乘之國頓戟象魏之下烈火焚於
王城飛矢集乎君屋機變儵忽終古莫二羣后憂惶元戎無主公

按劔凝神則奇謀貫世秉旄指麾則懦夫成勇曾不崇朝新亭獻捷信宿之間宣揚底定雲霧廓清區宇康乂此又公之功也皇室多難釁起感蕃邗晉應韓翻爲讎敵建平失圖興兵內侮公又指授六師義形乎色役未踰旬朱方盪晏此又公之功也蒼梧肆虐諸夏糜沸淫刑以逞誰則無罪火炎崑岡玉石俱焚黔首相悲朝不謀夕高祖之業已淪大明之軌誰嗣公遠稽殷漢之義近遵魏晉之典猥以眇身入奉宗祏七廟清謐九區反政此又公之功也袁粲無質劉秉攜貳韜述相扇成此亂階醜圖潛構危機竊發據有石頭志犯應路公神謀內運霜鋒外舉妖沴載澄國塗悅穆此又公之功也沈攸之苞禍歲月滋彰蜂目豺聲阻兵安忍哀彼荆漢獨爲匪民乃眷西顧緬同異域而經綸維始九伐未申長惡不悛遂逞凶逆驅合姦回勢過虓虎朝野憂疑三軍沮氣公秉鉞出

關凝威江甸正情與暎日同亮明略與秋雲競爽至義所感人百
其心鼗鼓一麾夏首靈謐雲梯未舉魯山剋定積年逋誅一朝顯
戮沮浦安流章臺順軌此又公之功也公有濟天下之勳重之以
明哲道庇生民志匡宇宙勦力肆心劬勞王室自東徂西靡有寧
晏險阻艱難備嘗之矣若乃締構宗稷之勤造物資始之澤雲布
霧散光被六幽弼予一人永清四海是以秬草騰芳於郊園景星
重暉於清漢遐方款關而慕義荒服重譯而來庭往哉邈乎無得
而名焉朕聞疇庸表德前王盛典崇樹侯伯有國攸同所以文命
成功玄珪顯錫姬旦秉哲曲阜啟蕃或改玉以弘風或胙土以宣
化禮絕常班寵冠羣辟爰逮桓文車服異數惟公勲業超於先烈
而褒賞闕於舊章古今之道何其爽歟靜言欽歎良有缺然今進
授相國以青州之齊郡徐州之梁郡南徐州之蘭陵魯郡琅邪東

海晉陵義興揚州之吳郡會稽凡十郡封公爲齊公錫茲玄土直以白茅定爾邦家用建豕社斯實尙父故藩世作盟主紀綱侯甸率由舊則往者周召建國師保兼任毛畢執珪入作卿士內外之寵同規在昔今命使持節兼太尉侍中中書監司空衛將軍零都縣開國侯淵授公相國印綬齊公璽紱持節兼司空守尙書令僧虔授齊公茅土金虎符第一至第五左竹使符第一至第十左相國位總百辟秩踰三事職以禮移號隨事革其以相國總百揆去錄尙書之稱送所假節侍中貂蟬中外都督太傅太尉印綬竟陵公印策其驃騎大將軍揚州牧南徐州刺史如故又加公九錫其敬聽後命以公執禮弘律儀彤區宇遐邇一體人無異業是用錫公大輅戎輅各一玄牡二駟公崇脩南畝所寶惟穀王府充實百姓繁衍是用錫公袞冕之服赤舄副焉公居身以謙導物以義鎔

鈞庶品罔不和悅是用錫公軒縣之樂六佾之舞公翼贊王猷聲
教遠洽蠻夷竭歡回首內附是用錫公朱戶以居公明鑿人倫澄
辨涇渭官方與能英乂克舉是用錫公納陛以登公保佑皇朝厲
身化下杜漸防萌含生夤式是用錫公虎賁之士三百人公禦宄
以刑禦姦以德君親無將將而必誅是用錫公鈇鉞各一公鳳舉
四維龍騫八表威靈所振異域同文是用錫公彤弓一彤矢百旅
弓十旅矢千公明發載懷肅恭禋祀孝敬之重義感靈祇是用錫
公秬鬯一卣珪瓚副焉齊國置丞相以下一遵舊式往欽哉其祇
服朕命經緯乾坤宏亮洪業茂昭爾大德闡揚我高祖之休命太
祖三讓公卿敦勸固請乃受之丁巳下令赦國內殊死以下今月
十五日昧爽以前一皆原赦鰥寡孤獨不能自存者賜穀五斛府
州所領亦同蕩然宋帝詔齊公十郡之外隨宜除用以齊國初建

給錢五百萬布五千匹絹五千匹四月癸酉詔進齊公爵爲王以
豫州之南梁陳郡潁川陳留南兗州之盱眙山陽秦郡廣陵海陵
南沛十郡增封使持節司空衛將軍褚淵奉策授璽紱改立王社
相國揚州牧驃騎大將軍南徐州刺史如故丙戌命齊王冕十有
二旒建天子旌旗出警入蹕乘金根車駕六馬備五時副車置旄
頭雲罕樂舞八佾設鍾虡宮縣王世子爲太子王女王孫爵命一
如舊儀辛卯宋帝禪位下詔曰惟德動天玉衡所以載序窮神知
化億兆所以歸心用能經緯乾坤彌綸宇宙闡揚鴻烈大庇生民
晦往明來積代同軌前王踵武世必由之宋德湮微昏毀相襲景
和騁悖於前元徽肆虐於後三光再霾七廟將墜璇極委馭含識
知泯我文武之祚眇焉如綴靜惟此素夕惕疚心相國齊王天誕
觀聖河嶽炳靈拯傾提危澄氛靜亂匡濟艱難功均造物宏謀霜

照祕算雲回旌旆所臨一麾必捷英風所拂無思不偃表裏清夷
遐邇寧謐旣而光啟憲章弘宣禮教姦宄之類覩隆威而隔情慕
善之儔仰徽猷而增厲道邁於重華勳超乎文命蕩蕩乎無得而
稱勇是以辮髮左衽之酋款關請吏木衣卉服之長航海來庭豈
惟肅慎獻楛越裳薦翬而已哉故四輿載宅六府克和川陸效珍
禎祥鱗集卿煙玉露旦夕揚藻嘉穉芝英晷刻呈茂革運斯炳代
終彌亮負屨握樞允歸明哲固以獄訟去宋謳歌適齊昔金政旣
淪水德締構天之厯數皎焉攸徵朕雖寡昧闔于大道稽覽隆替
爲日已久敢忘列代遺則人神至願乎便遜位別宮敬禪于齊一
依唐虞魏晉故事是日宋帝遜于東邸備羽儀乘畫輪車出東掖
門問今日何不奏鼓吹左右莫有荅者壬辰策命齊王曰伊太古
初陳萬物紛綸開耀靈以鑑品物立元后以馭蒸人若夫容成大

庭之世必義五龍之辰靡得而詳焉自軒黃以降墳素所紀略可
言者莫崇乎堯舜披金繩而握天鏡開玉匣而總地維德之休明
宸居靈極期運有終歸禪與能所以大唐遜位謗然興歌有虞指
讓卿雲發采亮符命之攸臻坦至公以成務懷生載懌靈祇效祉
遺風餘烈光被無垠漢魏因循弗敢失墜爰逮晉氏亦遵前儀惟
我祖宗英叡勳格幽顯從天人而齊七政凝至德而撫四維末葉
不造仍世多故難滅星謀兩雍本作日蝕星隕山淪川竭惟王聖哲淵明榮
鏡寓宙體望日之威資就雲之澤臨下以簡御眾以寬仁育羣生
義征不譴國塗荐阻弘五慮而又寧皇緒將湮秉六術以匡濟及
至權臣內侮蕃屏陵上兵革雲翔萬邦震駭裁之以武風綏之以
文化遐邇清夷表裏肅穆戢瑯戈而事黼黻委旌門而恭儒館聲
化遠洎荒服無塵殊類同規華戎一揆是以五光來儀於軒庭九

穗含芳於郊牧象緯昭澈布新之符已顯圖讖彪炳受終之義既
彰靈祇乃眷兆民引領朕聞至道深微惟人是弘天命無常惟德
是與所以仰鑒玄情俯察羣望敬禪神器授帝位于爾躬四海困
窮天祿永終於戲王其允執厥中儀刑前式以副率土之欣望命
司裘而謁蒼昊奏雲門而升圓丘時膺大禮永保洪業豈不盛歟
再命璽書曰皇帝敬問相國齊王大道之行與三代之英朕雖闇
昧而有志焉夫昏明相襲晷景之恆度春秋遞運時歲之常序求
諸天數猶且隆替矧伊在人能無終謝是故勛華弘風於上葉漢
魏垂式於後昆昔我高祖欽明文思振民育德皇靈眷命奄有四
海晚世多難姦宄寔繁鼗鼓宵聞元戎旦警億兆夷人啟處靡厝
加以嗣君荒怠敷虐萬方神鼎將遷寶策無主寶賴英聖匡濟艱
危惟王體天則地含弘光大明竝日月惠均雲雨國步斯梗則校

威外發王猷不造則淵謨內昭重構闔吳再寧淮濟靜九江之洪
波卷海圻之氛沴放斥凶昧存我宗祀舊物惟新三光改照逮至
寵臣裂冠則裁以廟略荆漢反噬則震以雷霆麾旆所臨風行草
靡神筭所指龍舉雲屬諸夏廓清戎翟思躋興文偃武闡揚洪烈
明保沖昧翱翔禮樂之場撫柔黔首咸濟仁壽之域自霜露所墜
星辰所經正朔不通人跡罕至者莫不踰山越海北面稱蕃款關
重譯脩其職貢是以禎祥發采左史載其奇玄象垂文保章審其
度鳳書表肆類之運龍圖顯班瑞之期重以珠衡日角神姿特挺
君人之義在事必彰書不云乎皇天無親惟德是輔民心無常惟
惠之懷神祇之眷如彼蒼生之願如此笙管變聲鍾石改調朕所
以擁璇持衡傾佇明哲昔金德既淪而傳祚于我有宋厯數告終
寔在茲日亦以水德而傳于齊式遵前典廣詢羣議王公卿士咸

曰惟宜今遣使持節兼太保侍中中書監司空衛將軍雩都縣侯淵兼太尉守尚書令僧虔奉皇帝璽綬受終之禮一依唐虞故事玉其允副幽明時登元后龍綬八表以酬昊天之休命太祖三辭宋帝王公以下固請兼太史令將作匠陳文建奏符命曰六宧位也後漢自建武至建安二十五年一百九十六年而禪魏魏自黃初至咸熙二年四十六年而禪晉晉自太始至元熙二年一百五十六年而禪宋宋自永初元年至昇明三年凡六十年咸以六終六受六宧位也驗往揆今若斯昭著敢以職任備陳管穴伏願順天時膺符瑞二朝百辟又固請尚書右僕射王儉奏被宋詔遜位臣等參議宜剋日輿駕受禪撰立儀注太祖乃許焉

史臣曰案太一九宮占推漢高五年太一在四宮主人與客俱得吉計先舉事者勝是歲高祖破楚晉元興二年太一在七宮太一

爲帝天目爲輔佐迫脅太一是年安帝爲桓玄所逼出宮大將在一宮參相在三宮格太一經言格者已立政事上下格之不利有爲安居之世不利舉動元興三年太一在七宮宋武破桓玄元嘉元年太一在六宮不利有爲徐傅廢營陽王七年太一在八宮關囚惡歲大小將皆不得立其年到彥之北伐初勝後敗客主俱不利十八年太一在二宮客主俱不利是歲氐楊難當寇梁益來年仇池破十九年大小將皆見關不立凶其年裴方明伐仇池剋百頃明年失之泰始元年太一在二宮爲大小將奄擊之其年景和廢二年太一在三宮不利先起主人勝其年晉安王子勛反元徽二年太一在六宮先起敗是歲桂陽王休範反竝伏誅四年太一在七宮先起者客西北走其年建平王景素敗昇明元年太一在七宮不利爲客安居之世舉事爲主人應發爲客袁粲沈攸之等

反伏誅是歲太一在杜門臨八宮宋帝禪位不利爲客安居之世
舉事爲主人禪代之應也

策文難滅星謀疑

御古
正和

主命其人與之

九月廿五日
八月廿五日



南齊書卷二

本紀第二

高帝下

建元元年夏四月甲午上卽皇帝位於南郊設壇柴燎告天曰皇

帝在諱

北齊本
作道成

敢用玄牡昭告皇皇后帝宋帝陟鑿乾序欽若明

命以命于諱

北齊本
作道成

夫肇自生民樹以司牧所以闡極則天開元

創物肆茲大道天下惟公命不于常昔在虞夏受終上代粵自漢

魏揖讓中葉咸炳諸典謨載在方冊水德旣微仍世多故寔賴諱

北齊本
作道成

匡拯之功以弘濟于厥艱大造顛墜再構區宇宣禮明刑

締仁緝義晷緯凝象川岳表靈誕惟天人罔弗和會乃仰協歸運

景屬與能用集大命于茲辭德匪嗣至于累仍而羣公卿士庶尹

御事爰及黎獻至于百戎僉曰皇天眷命不可以固違人神無託

不可以曠主畏天之威敢不祇從鴻厯敬簡元辰虔奉皇符升壇受禪告類上帝以永蒼民衷式敷萬國惟明靈是饗禮畢大駕還宮臨太極前殿詔曰五德更紹帝迹所以代昌三正迭隆王度所以改耀世有質文時或因革其資元膺厯經道振民固以異術同揆殊流共貫者矣朕以寡昧屬值艱季推肆勤之誠藉樂治之數賢能悉心士民致力用獲拯溺龕暴一匡天下業未參古功殆俾昔宋氏以陵夷有徵厯數攸及思弘樂推永鑒崇替爰集天祿于朕躬惟志菲薄辭弗獲昭遂欽從天人式繇景命祇月正于文祖升禋鬯于上帝猥以寡德光宅四海纂革代之蹤託王公之上若涉淵水罔知所濟寶祚初啟洪慶惟新思俾利澤宣被億兆可大赦天下改昇明三年爲建元元年賜人爵二級文武進位二等鰥寡孤獨不能自存者穀人五斛逋租宿債勿復收有犯鄉論清議

贓汗淫盜一皆蕩滌洗除先注與之更始長徒敕繫之囚特皆原
遣亾官失爵禁錮奪勞一依舊典封宋帝爲汝陰王築宮丹陽縣
故治行宋正朔車旗服色一如故事上書不爲表答表不稱詔宋
晉熙王變爲陰安公江夏王躋爲沙陽公隨王翽爲舞陰公新興
王嵩爲定襄公建安王禧爲荔浦公郡公主爲縣君縣公主爲鄉
君詔曰繼世象賢列代盛典疇庸嗣美前載令圖宋氏通侯乃宜
隨運省替但欽德懷義尙表墳閭况功濟區夏道光民俗者哉降
差之典宜遵往制南康縣公華容縣公可爲侯萍鄉縣侯可爲伯
減戶有差以繼劉穆之王弘何無忌後以司空褚淵爲司徒吳郡
太守柳世隆爲南豫州刺史詔曰宸運肇創寶命惟新宜弘慶宥
廣敷蠲汰劫賊餘口沒在臺府者悉原赦諸負費流徒普聽還本
士以齊國左衛將軍陳顯達爲中護軍中領軍王敬則爲南兗州

刺史左衛將軍李安民爲中領軍戊戌以荊州刺史疑爲尙書令
驃騎大將軍開府儀同三司揚州刺史冠軍將軍映爲荊州刺史
西中郎將晃爲南徐州刺史冠軍將軍垣崇祖爲豫州刺史驃騎
司馬崔文仲爲徐州刺史斷四方上慶禮己亥詔曰自廬井毀制
農桑易業鹽鐵妨民貨鬻傷治歷代成俗流蠹歲滋援拯遺弊革
未反本使公不專利氓無失業二宮諸王悉不得營立屯邸封略
山湖太官池籟宮停稅入優量省置庚子詔宋帝后蕃王諸陵宜
有守衛有司奏帝陵各置長一人兵有差王陵五人妃嬪三人五
月丙午進河南王吐谷渾拾寅號驃騎大將軍詔曰宸運革命引
爵改封宋氏第秩雖宜省替其有預效屯夷宣力齊業者一任本
封無所減降有司奏留襄陽郡公張敬兒等六十二人除廣興郡
公沈曇亮等百二十二入改元嘉祿爲建元祿木德盛卯終未以

正月卯祖十二月未臘丁未詔曰設募取將懸賞購士蓋出權宜
非曰恆制頃世艱險浸以成俗且長逋逸開罪山湖是爲黥刑不
辱亾竄無咎自今以後可斷眾募王子詔封佐命文武功臣新除
司徒褚淵等三十一人進爵增戶各有差乙卯河南王吐谷渾拾
寅奉表貢獻丙辰詔遣大使分行四方遣兼散騎常侍十二人巡
行以交寧道遠不遣使己未汝陰王薨追謚爲宋順帝終禮依魏
元晉恭帝故事辛酉陰安公劉燮等伏誅追封謚上兄道度爲衡
陽元王道生爲始安貞王丙寅追尊皇考曰宣皇帝皇妣爲孝皇
后妃爲昭皇后六月辛未詔相國驃騎中軍三府職可依資勞度
三官若職限已盈所餘可賜滿壬申以游擊將軍周山圖爲兗州
刺史乙亥詔曰宋末頻年戎寇兼災疾凋損或枯骸不收毀櫬莫
掩宜速宣下埋藏營卹若標題猶存姓字可識可卽運載致還本

鄉有司奏遣外監典事四人周行離門外三十五里爲限其餘班
下州郡無棺器標題者屬所以臺錢供市庚辰七廟主備法駕卽
于太廟詔諸將及客勳力艱難盡勤直衛其從還宮者普賜位一
階辛巳罷荊州刺史甲申立皇太子諱北雍本斷諸州郡禮慶見
刑入重者降一等并申前赦恩百日立皇子疑爲豫章王映爲臨
川王晃爲長沙王暉爲武陵王暠爲安成王鏘爲鄱陽王鏐爲桂
陽王鑑爲廣陵王皇孫長懋爲南郡王乙酉葬宋順帝于遂寧陵
秋七月丁未詔曰交阯比景獨隔書朔斯乃前運方季負海不朝
因迷遂往歸款莫由曲赦交州部內李叔獻一人卽撫南土文武
詳才選用并遣大使宣揚朝恩以試守武平太守行交州府事李
叔獻爲交州刺史丙辰以虜僞茄蘆鎮主陰平公楊廣香爲沙州
刺史丁巳詔南蘭陵桑梓本鄉長蠲租布武進王業所基復十年

九月辛丑詔二天義興三郡遭水減今年田租乙巳以新除尙書
令驃騎將軍豫章王疑爲荆湘二州刺史平西將軍臨川王映爲
揚州刺史丙午司空褚淵領尙書令戊申車駕幸宣武堂宴會詔
諸王公以下賦詩冬十月丙子立彭城劉曄爲汝陰王奉宋帝後
己卯車駕殷祠太廟辛巳詔曰朕嬰綴世務三十餘歲險阻艱難
備嘗之矣末路屯夷戎車歲駕誠藉時來之運實資士民之力宋
元徽二年以來諸從軍得官者未悉蒙祿可催速下訪隨正卽給
才堪餘任者訪洗量序若四州士庶本鄉淪陷簿籍不存尋校無
所可聽州郡保押從實除奏荒遠闕中正者特許據軍簿奏除或
戍扞邊役末由旋反聽於同軍各立五保所隸有司時爲言列汝
陰太妃王氏薨追贈爲宋恭皇后十一月庚子以太子左衛率蕭
景先爲司州刺史辛亥立皇太子妃裴氏甲申封功臣驃騎長史

江謐等十一人爵戶各有差

二年春正月戊戌朔大赦天下以司空尚書令褚淵爲司徒中軍將軍張敬兒爲車騎將軍中領軍李安民爲領軍將軍中護軍陳顯達爲護軍將軍辛丑車駕親祠南郊癸卯詔索虜寇淮泗遣眾軍北伐內外纂嚴二月丁卯虜寇壽陽豫州刺史垣崇祖破走之置巴州壬申以三巴校尉明慧昭爲巴州刺史戊子以靈巒校尉蕭赤斧爲雍州刺史南蠻長史崔惠景爲梁南秦二州刺史辛卯詔西境獻捷解嚴癸巳遣大使巡慰淮肥徐豫邊民尤貧邁難者刺史二千石量加賑卹甲午詔江西北民避難流徙者制遣還本土蠲今年租稅單貧及孤老不能自存者卽聽番籍郡縣押領三月丁酉以侍中西昌侯諱北雍木作鸞爲郢州刺史戊戌以護軍將軍陳顯達爲南兖州刺史吳郡太守張岱爲中護軍己亥車駕幸樂

遊宴會王公以下賦詩辛丑以征虜將軍崔思祖爲青冀二州刺史夏四月丙寅進高麗王樂浪公高璉號驃騎大將軍五月立六門都牆六月癸未詔昔歲水旱曲赦丹陽二吳義興四郡遭水尤劇之縣元年以前三調未充虛列已畢官長局吏應共償備外詳所除宥秋七月甲寅以輔國將軍盧紹之爲青冀二州刺史戊午皇太子妃裴氏薨閏月辛巳遣領軍將軍李安民行淮泗庚寅索虜攻朐山青冀二州刺史盧紹之等破走之冬十一月戊子以氏楊後起爲秦州刺史十二月戊戌以司空褚淵爲司徒乙巳車駕幸中堂聽訟王子以驃騎大將軍豫章王疑爲司空揚州刺史前將軍臨川王映爲荊州刺史

三年春正月壬戌朔詔王公卿士薦讜言丙子以平北將軍陳顯達爲益州刺史貞陽公桺世隆爲南兖州刺史皇子鋒爲江夏王

領軍將軍李安民等破虜於淮陽夏四月以寧朔將軍沈景德爲廣州刺史六月壬子大赦逋租宿債除減有差秋七月以冠軍將軍垣榮祖爲徐州刺史冬十月戊子以河南王世子吐谷渾度易侯爲西秦河二州刺史河南王

四年春正月壬戌詔曰夫膠庠之典彝倫攸先所以昭振才端啟發性緒弘字黎氓納之軌義是故五禮之迹可傳六樂之容不泯朕自膺厯受圖志闡經訓且有司羣僚奏議咸集蓋以戎車時警文教未宣思樂泮宮永言多慨今關雎無虞時和歲稔遠邇同風華夷慕義便可式遵前准脩建敦學精選儒官廣延國胄以江州刺史王延之爲右光祿大夫癸亥詔曰比歲申威西北義勇爭先殞氣寇場命盡王事戰亡蠲復雖有恆典主者遵用每傷簡薄建元以來戰亡賞蠲租布二十年雜役十年其不得收屍主軍保押

亦同此例以後將軍長沙王晃爲護軍將軍中軍將軍南郡王長懋爲南徐州刺史冠軍將軍安成王暕爲江州刺史二月乙未以冠軍將軍桓康爲青冀二州刺史上不豫庚辰詔原京師囚繫有差元年以前逋責皆原除三月庚申召司徒褚淵左僕射王儉詔曰吾本布衣素族念不到此因藉時來遂隆大業風道沾被升平可期邁疾彌留至于大漸公等奉太子如事吾柔遠能邇緝和內外當令太子敦穆親戚委任賢才崇尚節儉弘宣簡惠則天下之理盡矣死生有命夫復何言壬戌上崩于臨光殿年五十六四月庚寅上謚曰太祖高皇帝奉梓宮于東府前渚升龍舟丙午窆武進秦安陵上少沈深有大量寬嚴清儉喜怒無色博涉經史善屬文工草隸書弈碁第二品雖經綸夷險不廢素業從諫察謀以威重得眾卽位後身不御精細之物敕中書舍人桓景眞曰主衣中

似有玉介導此制始自大明末後泰始尤增其麗留此置主衣政是興長疾源可卽時打碎凡復有可異物皆宜隨例也後宮器物欄檻以銅爲飾者皆改用鐵內殿施黃紗帳宮人著紫皮履華蓋除金花爪用鐵迴釘每曰使我治天下十年當使黃金與土同價欲以身率天下移變風俗上姓名骨體及期運厯數竝遠應圖讖數十百條歷代所未有臣下撰錄上抑而不宣盛矣

史臣曰孫卿有言聖人之有天下受之也非取之也漢高神武駿聖觀秦氏東遊蓋是雅多大言非始自知天命光武聞少公之論讖亦特一時之笑語魏武初起義兵所期征西之墓晉宣不內迫曹爽豈有定霸浮橋宋氏崛起匹夫兵由義立咸皆一世推雄卒開鼎祚宋氏正位八君十年五紀四絕長嫡三稱中興內難邊虞兵革世動太祖基命之初武功潛用泰始開運大拯時艱龍德在

田見猜雲雨之迹及蒼梧暴虐覺結朝野百姓懍懍命懸朝夕權道既行兼濟天下元功振主利器難以假人羣才勦力實懷尺寸之望豈其天厭水行固己人希木德歸功與能事極乎此雖至公於四海而運實時來無心於黃屋而道隨物變應而不爲此皇齊所以集大命也

贊曰於皇太祖有命自天同度宇宙合量山淵宋德不紹神器虛傳寧亂以武黜暴資賢庸發西疆功興北翰偏師獨克孤旅霆斷援旆東夏職司靜亂指斧徐方時惟伐叛抗威京輦坐清江漢文藝在躬芳塵淵塞用下以才鎮民以德端己雄睟君臨尊默苞括四海大造家國

南齊書卷三

本紀第三

武帝

世祖武皇帝諱曠字宣遠太祖長子也小諱龍兒生於建康青溪宅其夜陳孝后劉昭后同夢龍據屋上故字上焉初爲尋陽國侍郎碎州西曹書佐出爲贛令江州刺史晉安王子勛反上不從命南康相沈肅之繫上於郡獄族人蕭欣祖門客桓康等破郡迎出上肅之率將吏數百人追擊上與左右拒戰生獲肅之斬首百餘版遂率部曲百餘人舉義兵始興相殷孚將萬兵赴子勛於尋陽或勸上擊之上以眾寡不敵避屯揭陽山中聚眾至三千人子勛遣其將戴凱之爲南康相及軍主張宗之千餘人助之上引兵向郡擊凱之別軍主程超數百人於南康口又進擊宗之破斬之遂

圍郡城凱之以數千人固守上親率將士盡日攻之城陷凱之奔
走殺僞贛令陶冲之上卽據郡城遣軍主張應期鄧惠真三千人
襲豫章子勛遣軍主談秀之等七千人與應期相拒於西邑築營
壘交戰不能決聞上將自下秀之等退散事平徵爲尙書庫部郎
征北中兵參軍西陽縣子帶南東莞太守越騎校尉正員郎劉韞
撫軍長史襄陽太守別封贛縣子邑三百戶固辭不受轉寧朔將
軍廣興相桂陽王休範反上遣軍襲尋陽至北嶠事平除晉熙王
安西諮議不拜復還郡轉司徒右長史黃門郎沈攸之在荆楚宋
朝密爲之備元徽四年以上爲晉熙王鎮西長史江夏內史行郢
州事順帝立徵晉熙王燮爲撫軍揚州刺史以上爲左衛將軍輔
變俱下沈攸之事起未得朝廷處分上以中流可以待敵卽據盆
口城爲戰守之備太祖聞之喜曰此眞我子也上表求西討不許

乃遣偏軍援郢平西將軍黃回等皆受上節度加上冠軍將軍持節昇明二年事平轉散騎常侍都督江州豫州之新蔡晉熙二郡軍事征虜將軍江州刺史持節如故封聞喜縣侯邑二千戶其年徵侍中領軍將軍給鼓吹一部府置佐史領石頭戍軍事尋又加持節督京畿諸軍事三年轉散騎常侍尚書僕射中軍大將軍開府儀同三司進爵爲公持節都督領軍如故給班劍二十八齊國建爲齊公世子改加侍中南豫州刺史給油絡車羽葆鼓吹增班劍爲四十人以石頭爲世子宮官置二率以下坊省服章一如東宮進爵王太子太祖卽位爲皇太子建元四年三月壬戌太祖崩上卽位大赦征鎮州郡令長軍屯營部各行喪三日不得擅離任都邑城守防備幢隊一不得還乙丑稱先帝遺詔以司徒褚淵錄尚書事尚書左僕射王儉爲尚書令車騎將軍張敬兒爲開府儀

同三司詔曰喪禮雖有定制先旨每存簡約內官可三日一還臨外官間一日還臨後有大喪皆如之丁卯以右衛將軍呂安國爲司州刺史庚午以司空豫章王巖爲太尉癸酉詔曰城直之制歷代宜同頃歲逋弛遂以萬計雖在憲宜懲而原心可亮積年逋城可悉原蕩自茲以後申明舊科有違糾裁庚辰詔曰比歲未稔貧窮不少京師二岸多離其弊遣中書舍人優量賑卹夏四月丙午以輔國將軍張倪爲兗州刺史辛卯追尊穆妃爲皇后五月乙丑以丹陽尹聞喜公子良爲南徐州刺史甲戌以新除左衛將軍垣崇祖爲豫州刺史癸未詔曰頃水雨頻降潮流荐滿二岸居民多所淹漬遣中書舍人與兩縣官長優量賑卹六月甲申立皇太子長懋詔申壬戌赦恩百日乙酉以鄱陽王鏘爲雍州刺史臨汝公子卿爲郢州刺史甲午以寧朔將軍臧靈智爲越州刺史丙申立

皇太子妃王氏進封聞喜公子良爲帝陵王臨汝公子卿爲廬陵
王應城公子敬爲安陸王江陵公子懋爲晉安王枝江公子隆爲
隨郡王皇子子眞爲建安王皇孫昭業爲南郡王戊戌詔曰水潦
爲患星緯乖序京都囚繫可剋日訊決諸遠獄委刺史以時察判
建康秣陵二縣貧民加賑賜必令周悉吳興義興遭水縣蠲除租
調癸卯以司徒褚淵爲司空驃騎將軍秋七月庚申以衛尉蕭諱
祖雍本
作順之爲豫州刺史壬戌以冠軍將軍垣榮祖爲青冀二州刺史
八月癸卯司徒褚淵薨九月丁巳以國衰故罷國子學己巳以前
軍將軍姜伯起爲秦州刺史辛未以征南將軍王僧虔爲左光祿
大夫開府儀同三司尙書右僕射王奐爲湘州刺史冬十二月己
丑詔曰緣淮戍將久處邊勞三元行始宜沾恩慶可遣中書舍人
宣旨臨會後每歲皆如之庚子以太子左衛率戴僧靜爲徐州刺

史

永明元年春正月辛亥車駕祠南郊大赦改元王子詔內外羣僚各舉朕違肆心規諫又詔王公卿士各舉所知隨方登敘詔曰經邦之寄寔資莅民守宰祿奉益有恆準往以邊虞告警故沿時損益今區寓盜晏庶績咸熙念勤簡能官加優獎郡縣丞尉可還田秩太尉豫章王疑領太子太傅護軍將軍長沙王晃爲南徐州刺史鎮北將軍竟陵王子良爲南兗州刺史庚申以侍中蕭景先爲中領軍壬戌立皇弟銳爲南平王鏗爲宜都王皇子子明爲武昌王子罕爲南海王甲子爲築青溪舊宮詔梁仗瞻履二月辛巳以征虜將軍楊炅爲沙州刺史辛丑以隴西公宕昌王梁彌機爲河涼二州刺史東羌王像舒彭爲西涼州刺史三月癸丑詔曰宋德將季風軌陵遲列宰庶邦彌失其序遷謝造速公私凋弊泰運初

基草昧惟始思述先範永隆治根莅民之職一以小滿爲限其有
聲績剋舉厚加甄異理務無庸隨時代黜丙辰詔曰朕自丁荼毒
奄便周忌瞻言負荷若墜淵壑而遠圖尙蔽政刑未理星緯失序
陰陽愆度思播先澤兼酬天旨可申辛亥赦恩五十日以期訖爲
始京師囚繫悉皆原宥三署軍徒優量降遣都邑鰥寡尤貧詳加
賑卹戊寅詔四方見囚罪無輕重及劫賊餘口長徒赦繫悉原赦
通負督贓建元四年三月以前皆特除夏四月壬午詔曰魏矜袁
紹恩洽巨墓晉亮兩王榮覃餘裔二代弘義前載美談袁粲劉秉
與先朝同獎宋室沈攸之於景和之世特有迺心雖末節不終而
始誠可錄歲月彌往宜特優降粲秉前年改葬塋兆未脩材槨可
爲經理令粗足周禮攸之及其諸子喪柩在西者可符荊州送反
舊墓在所爲營葬事孟月丁酉車騎將軍張敬兒伏誅六月丙寅

詔凡坐事應覆治者在建元四年三月巳前皆原宥秋七月戊戌
新除左光祿大夫王僧虔加特進九月巳卯以荊州刺史臨川王
暎爲驃騎將軍冠軍將軍廬陵王子卿爲荊州刺史吳郡太守安
陸侯緬爲郢州刺史

二年春正月乙亥以司州刺史呂安國爲南兖州刺史征北將軍
竟陵王子良爲護軍將軍兼司徒征北長史劉悛爲司州刺史丙
子以右光祿大夫王延之爲特進三月乙亥以吳興太守張岱爲
南兖州刺史前將軍王奐爲江州刺史平北將軍呂安國爲湘州
刺史戊寅以少府趙景翼爲廣州刺史夏四月甲辰詔揚南徐南
兖徐兖五州統內諸獄并豫江三州府州見囚江州尋陽新蔡兩
郡繫獄竝部送還臺須候克日斷枉直緣江遠郡及諸州委刺史
詳察訊已巳以寧朔將軍程法勤爲寧州刺史六月癸卯車駕幸

中堂聽訟乙巳以安陸王子敬爲南兖州刺史戊申以黃門侍郎
崔平仲爲青冀二州刺史秋七月癸未詔曰夫樂所自生先哲垂
誥禮不愆本積代同風是以漢光遲回於南陽魏文殷勤於譙國
青溪宮體天含暉則地栖寶光定靈源允集符命在昔期運初開
經綸方遠繕築之勞我則未暇時流事往永唯哽咽朕以寡薄嗣
奉鴻基思存締構式表王迹考星創制揆日興功子來告舉規摹
昭備宜申豐落之禮以暢感尉之懷可克日小會甲申立皇子子
倫爲巴陵王八月丙午車駕幸舊宮小會設金石樂在位者賦詩
詔申京師獄及三署見徒量所降宥領宮職司詳賜幣帛戊申車
駕幸玄武湖講武甲子詔曰窆枯掩骼義重前誥卹老哀癯寔惟
令典朕求思民瘼弗忘鑒寐聲憶未敷物多乖所京師二縣或有
久墳毀發可隨宜掩埋遺骸未覩竝加斂瘞疾病窮困不能自存

者詳爲條格竝加沾賚冬十月丁巳以桂陽王鐸爲南徐州刺史十一月丁亥以始興王鏗爲益州刺史

三年春正月丙辰以大司農劉楷爲交州刺史安西諮議參軍崔慶緒爲南梁秦二州刺史甲申以晉安王子懋爲南豫州刺史辛卯車駕祠南郊大赦都邑三百里內罪應入重者降一等餘依赦制劾繫之身降遣有差賑卹二縣貧民又詔曰春秋國語云生民之有學教猶樹木之有枝葉果行育德咸必由茲在昔開運光宅華夏方弘典謨克隆教思命彼有司崇建庠塾甫就經始仍離屯故仰瞻徽猷歲月彌遠今遐邇一體車軌同文宜高選學官廣延胄子又詔守宰親民之要刺史案部所先宜嚴課農桑相土揆時必窮地利若耕蠶殊眾足屬浮惰者所在卽便列奏其違方驕矜佚事妨農亦以名聞將明賞罰以勸勤怠校覈殿最歲竟考課以

申黜陟二月辛丑車駕祠北郊夏四月戊戌以新除右衛將軍豫
章王世子子響爲豫州刺史輔國將軍桓敬爲兗州刺史五月乙
未詔曰氓俗凋弊于茲永久雖年穀時登而歎之比室凡單丁之
身及瑩獨而秩養養孤者竝蠲今年田租是月省總明觀六月庚
戌進河南王度易侯爲車騎將軍秋七月辛丑詔丹陽所領及餘
二百里內見囚同集京師自此以外委州郡決斷甲戌左光祿大
夫開府儀同三司王僧虔薨丁亥以驃騎中兵參軍董仲舒爲寧
州刺史八月乙未車駕幸中堂聽訟丁巳以行宕昌王梁彌頡爲
河涼二州刺史戊午以尙書令王儉領太子少傅太子詹事蕭諱
北雍本作順之爲領軍將軍冬十月壬戌詔曰皇太子諱北雍本作長懋講畢當
釋奠王公以下可悉往觀禮十一月乙丑以冠軍將軍王文仲爲
青冀二州刺史十二月丁酉詔曰九穀之重八材爲末是故潔粢

豐盛祝史無愧于辭不藉千畝周宣所以貽諫昔期運初啟庶政
草昧三推之典我則未暇朕嗣奉鴻基思隆先軌載耒躬親率由
舊式可以開春發歲敬簡元辰鳴青鸞於東郊冕朱紘而莅事仰
薦宗禋俯勛黔阜將使困庾內充遺秉外物既富而教茲焉攸在
是夏琅邪郡旱百姓芟除枯苗至秋擢穎大熟

四年春正月甲子以南琅邪彭城二郡太守隨郡王子隆爲江州
刺史征虜長史張瓌爲雍州刺史征虜將軍薛淵爲徐州刺史護
軍將軍兼司徒竟陵王子良進號車騎將軍富陽人唐寓之反聚
眾桐廬破富陽錢塘等縣害東陽太守蕭崇之遣宿衛兵出討伏
誅丁酉冠軍將軍馬軍主陳天福坐討唐寓之燒掠百姓棄市辛
卯車駕幸中堂策秀才閏月癸巳立皇太子貞爲邵陵王皇孫昭
文爲臨汝公丁未以武都王楊集始爲北秦州刺史辛亥車駕藉

田詔曰夫耕藉所以表敬親載所以率民朕景行前規躬執耒耜
千畝成事六稔可期教義克宣誠感兼暢重以天符靈貺歲月鱗
萃寶鼎開玉匣之祥嘉禾發同穗之穎甘露凝暉於坳牧神爵蹇
翥於蘭囿斯乃宗稷之慶豈寡薄所臻思俾休和覃茲黔阜見刑
罪殊死以下悉原有諸逋負在三年以前尤窮弊者一皆蠲除孝
悌力田詳授爵位孤老貧窮賜穀十石凡欲附農而糧種闕乏者
竝加給貸務在優厚癸丑以始興內史劉勅爲廣州刺史甲寅以
藉田禮畢車駕幸閤武堂勞酒小會詔賜王公以下在位者帛有
差戊午車駕幸宣武堂講武詔曰今親閱六師少長有禮領馭羣
帥可量班賜二月己未立皇弟錄爲晉熙王鉉爲河東王庚寅以
光祿大夫王玄載爲兗州刺史三月辛亥國子講孝經車駕幸學
賜國子祭酒博士助教絹各有差夏四月丁亥以尙書左僕射柳

世隆爲湘州刺史臨沂縣麥不登刈爲馬芻至夏更苗秀五月癸巳詔楊南徐二州今年戶租三分二取見布一分取錢來歲以後遠近諸州輸錢處並減布直匹准四百依舊折半以爲永制丙午以吳興太守西昌侯諱北雍本作鬱爲中領軍秋八月辛酉以鎮南長史蕭惠休爲廣州刺史九月甲寅以征虜將軍王廣之爲徐州刺史冬十二月乙亥以東中郎司馬崔惠景爲司州刺史

五年春正月戊子以太尉豫章王嶷爲大司馬車騎將軍竟陵王子良爲司徒驃騎將軍臨川王映衛將軍王儉中軍將軍王敬則並本號開府儀同三司都官尙書沈文季爲郢州刺史左將軍安陸王子敬爲荊州刺史征虜將軍晉安王子懋爲南兖州刺史輔國將軍建安王子眞爲南豫州刺史辛卯詔曰朕昧爽丕顯思康民瘼雖年穀亟登而饑饉代有今履端肇運陽和告始宜協時休

覃茲黎庶諸孤老貧病竝賜糧餼遣使親賦每存均普雍司二州蠻虜屢動丁酉遣丹陽尹蕭景先出平陽護軍將軍陳顯達出宛葉二月戊子車駕幸芳林園禊宴丁未以護軍將軍陳顯達爲雍州刺史夏四月車駕殷祠太廟詔繫囚見徒四歲刑以下悉原遣五年減爲三歲京邑罪身應入重降一等六月辛酉詔曰比霖雨過度水潦洊溢京師居民多離其弊遣中書舍人二縣官長隨宜賑賜秋七月戊申詔丹陽屬縣建元四年以來至永明三年所逋田租殊爲不少京甸之內宜加優貸其非中貲者可悉原停八月乙亥詔今夏雨水吳興義興二郡田農多傷詳蠲租調九月己丑詔曰九日出商飈館登高宴羣臣辛卯車駕幸商飈館館上所立在孫陵岡世呼爲九日臺者也丙午詔曰善爲國者使民無傷而農益勸是以十一而稅周道克隆開建常平漢載惟穆岱畎絲枲

浮汶來貢杞梓皮革必緣楚往自水德將謝喪亂彌多師旅歲興
饑饉代有貧室盡於課調泉貝傾於絕域軍國器用動資四表不
因厥產咸用九賦雖有交貿之名而無潤私之實民咨塗炭寔此
之由昔在開運星紀未周餘弊尙重農桑不殷於曩日粟帛輕賤
於當年工商罕兼金之儲匹夫多饑寒之患良由圓法久廢上幣
稍寡所謂民失其資能無匱乎凡下貧之家可蠲三調二年京師
及四方出錢億萬糴米穀絲綿之屬其和價以優黔首遠邦嘗市
雜物非土俗所產者皆悉停之必是歲賦攸宜都邑所乏可見直
和市勿使逋刻冬十月甲申以中領軍西昌侯諱北雍本
作鸞爲豫州
刺史侍中安陸侯緬爲中領軍初起新林苑

六年春正月壬午以祠部尙書安成王暉爲南徐州刺史詔二百
里內獄同集京師剋日聽覽自此以外委州郡訊察三署徒隸詳

所原釋三月己亥以豫章王世子子響爲巴東王癸卯以光祿大夫周盤龍爲行兖州刺史五月甲午以宕昌王梁彌承爲河涼二州刺史六月甲寅以散騎常侍沈景德爲徐州刺史丙子以始興太守房法乘爲交州刺史秋七月乙巳都官尙書呂安國爲領軍將軍八月乙卯詔吳興義興水潦被水之鄉賜痼疾篤癘口二斛老疾一斛小口五斗九月壬寅車駕幸琅邪城講武習水步軍冬十月庚申立冬初臨太極殿讀時令辛酉以祠部尙書武陵王暉爲江州刺史閏月乙卯詔曰北兖北徐豫司青冀八州邊接疆場民多懸罄原永明以前所逋租調辛卯以尙書僕射王奐爲領軍將軍十一月乙卯以羽林監費延宗爲越州刺史庚申以後將軍晉安王子懋爲湘州刺史西陽王子明爲南兖州刺史

七年春正月丙午以史軍將軍王敬則爲豫州刺史中軍將軍陰

智伯爲梁南秦二州刺史戊申詔曰雍州頻歲戎役兼水旱爲災
原四年以前逋租辛亥車駕祠南郊大赦京邑貧民普加賑賜又
詔曰春頒秋斂萬邦所以惟懷柔遠能邇兆民所以允殖鄭渾宰
邑因姓立名王濬剖符戶口殷盛今產子不育雖炳常禁比聞所
在猶或有之誠復禮以貧殺抑亦情由俗淡宜節以嚴威敦以惠
澤主者尋舊制詳量附定蠲卹之宜務存優厚壬戌驃騎將軍開
府儀同三司臨川王映薨戊辰詔曰諸大夫年秩隆重祿力殊薄
豈所謂下車惟舊趨橋敬老可增俸詳給見役二月丙子以左衛
將軍巴東王子響爲中護軍己丑詔曰宣尼誕敷文德峻極自天
發輝七代陶鈞萬品英風獨舉素王誰匹功隱於當年道深於日
月感麟厭世緬邈千祀川竭谷虛巨夷淵塞非但洙泗湮淪至乃
響嘗之主翁王敬仰崇脩寢廟歲月亟流鞠爲茂草今學教興立

實稟洪規撫事懷人彌增欽屬可改築宗祊務在爽塏量給祭秩
禮同諸侯奉聖之爵以時紹繼壬申以丹陽尹王晏爲江州刺史
癸卯以巴陵王子倫爲豫州刺史三月丁未以太子右衛率王玄
邈爲兗州刺史庚戌以中護軍巴東王子響爲江州刺史中書令
隨郡王子隆爲中護軍甲寅立皇子子岳爲臨賀王子峻爲廣漢
王子琳爲宣城王子珉爲義安王夏四月戊寅詔曰婚禮下達人
倫攸始周官設媒氏之職國風興及時之詠四爵內陳義不期侈
三鼎外列事豈存奢晚俗浮麗歷茲永久每思懲革而民未知禁
乃聞同牢之費華泰尤甚膳羞方丈有過王侯富者扇其驕風貧
者恥躬不逮或以供帳未具動致推遷年不再來盛時忽往宜爲
節文頒之士庶竝可擬則公朝方標供設合禋之禮無虧靈儉之
義斯在如故有違繩之以法五月乙巳尙書令衛將軍開府儀同

三司王儉薨甲子以新除尚書左僕射柳世隆爲尚書令六月丁亥車駕幸琅邪秋八月庚子以左衛將軍建安王子眞爲中護軍冬十月己丑詔曰三季澆浮舊章陵替吉凶奢靡動違矩則或裂錦繡以競車服之飾塗金鏤石以窮坐域之麗至班白不婚露棺累葉苟相姘衒因顯大典可明爲條制嚴勒所在悉使畫一如復違犯依事糾奏十二月己亥以中護軍建安王子眞爲郢州刺史江州刺史巴東王子響爲荊州刺史前安西司馬垣榮祖爲兖州刺史

八年春正月庚子征西大將軍王敬則進號驃騎大將軍左將軍沈文季爲領軍將軍丹陽尹鄱陽王勳爲江州刺史詔放遣隔城虜俘聽還本土壬辰零陵王司馬藥師薨夏四月戊辰詔公卿已下各舉所知隨才授職進得其人受登賢之賞薦非其才獲濫舉

之罰秋七月辛丑以會稽太守安陸侯緬爲雍州刺史癸卯詔曰
陰陽舛和緯象愆度儲肩嬰患淹歷旬晷思仰祇天戒俯紓民瘼
可大赦天下癸亥詔司雍二州比歲不稔雍州八年以前司州七
年以前通租悉原汝南一郡復限更申五年八月丙寅詔京邑霖
雨旣過居民汎濫遣中書舍人二縣官長賑卹乙酉以行河南王
世子休留代爲秦河二州刺史壬辰以左衛將軍隨郡王子隆爲
荊州刺史巴東王子響有罪遣丹陽尹蕭諱北雍本作順之率軍討之子
響伏誅冬十月丁丑詔吳興水淹過度開所在倉賑賜癸巳原建
元以前通租十一月乙卯以建武將軍伏登之爲交州刺史十二
月乙丑以振威將軍陳僧授爲越州刺史戊寅詔尙書丞郎職事
繁劇卹俸未優可量增賜祿己卯皇子子建爲湘東王癸巳以監
青冀二州軍行刺史事張沖爲青冀二州刺史

九年春正月甲午以侍中江夏王鋒爲南徐州刺史冠軍將軍劉
俊爲益州刺史辛丑車駕祠南郊詔京師見囚繫詳量原遣三月
乙卯以南中郎司馬劉楷爲司州刺史辛丑以太子左衛率劉纘
爲廣州刺史夏四月乙亥有司奏舊格一年兩過行陵三月十五
日曹郎以下小行九月十五日司空以下大行今長停小行唯二
州一大行詔曰可六月甲戌以尙書左僕射王奐爲雍州刺史秋
九月戊辰車駕幸琅邪城講武觀者傾都普頒酒肉

十年春正月戊午詔諸責負眾逋七年以前悉原除高貲不在例
孤老六疾人穀五斛内外有務眾官增祿俸以左民尙書南平王
銳爲湘州刺史司徒竟陵王子良領尙書令右衛將軍王玄邈爲
北徐州刺史中軍將軍廬陵王子卿進號車騎將軍北中郎將南
海王子罕爲兖州刺史輔國將軍臨汝公昭文爲南豫州刺史冠

軍將軍王文和爲北兗州刺史二月壬寅鎮軍將軍陳顯達領中
領軍夏四月辛丑大司馬豫章王疑薨五月己巳司徒竟陵王子
良爲揚州刺史秋八月丙申以新城太守郭安明爲盩州刺史冬
十月乙丑車駕幸玄武湖講武甲午車駕殷祠太廟十一月戊午
詔曰頃者霖雨樵糧稍貴京邑居民多離其弊遣中書舍人二縣
官長賑賜

十一年春正月癸丑詔京師見繫囚詳所原遣以驃騎大將軍王
敬則爲司空江州刺史鄱陽王鏘爲領軍將軍鎮軍大將軍陳顯
達爲江州刺史右衛將軍崔慧景爲豫州刺史丙子皇太子長懋
薨二月壬午以車騎將軍廬陵王子卿爲驃騎將軍南豫州刺史
撫軍將軍安陸王子敬進號車騎將軍己丑輔國將軍曹虎爲梁
南秦二州刺史癸卯以新除中書監晉安王子懋爲雍州刺史丙

午以冠軍將軍王文和爲益州刺史三月乙亥雍州刺史王奐伏
誅夏四月壬午詔東宮文武臣僚可悉度爲太孫官屬甲午立皇
太孫昭業太孫妃何氏詔賜天下爲父後者爵一級孝子順孫義
夫節婦粟帛各有差癸卯以驍騎將軍劉靈哲爲兗州刺史五月
戊辰詔曰水旱成災穀稼傷斃凡三調眾逋可同申至秋登京師
二縣朱方姑熟可權斷酒庚午以輔國將軍蕭惠休爲徐州刺史
丙子以左民尙書宜都王鏗爲南豫州刺史六月壬午詔霖雨旣
過遣中書舍人二縣官長賑賜京邑居民秋七月丁巳詔曰頃風
水爲災二岸居民多離其患加以貧病六疾孤老稚弱彌足矜念
遣中書舍人履行沾卹又詔曰水旱爲災實傷農稼江淮之閭倉
廩旣虛遂草竊充斥互相侵奪依阻山湖成此逋逃曲赦南兗兗
豫司徐五州南豫州之歷陽譙臨江廬江四郡三調眾逋宿債並

同原除其緣淮及青冀新附僑民復除已訖更申五年是月上不
豫徙御延昌殿乘輿始登階而殿屋鳴咤上惡之虜侵邊戊辰遣
江州刺史陳顯達鎮雍州樊城上慮朝野憂惶乃力疾召樂府奏
正聲伎戊寅大漸詔曰始終大期賢聖不免吾行年六十亦復何
恨但皇業艱難萬機事重不能無遺慮耳太孫進德日茂社稷有
寄子良善相毗輔思弘治道內外眾事無大小悉與諱北齊本
作鸞參
懷其下意尙書中南齊本
無中字是職務根本悉委王晏徐孝嗣軍旅捍
邊之略委王敬則陳顯達王廣之王玄邈沈文季張瓌薛淵等百
辟庶僚各奉爾職謹事太孫勿有懈怠知復何言又詔曰我識滅
之後身上著夏衣畫天衣純身犀導應諸器悉不得用寶物及織
成等唯裝複袂衣各一通常所服身刀長短二口鐵環者隨我入
梓宮祭敬之典本在因心東鄰殺牛不如西家禴祭我靈上慎勿

以牲爲祭唯設餅茶飲干飯酒脯而已天下貴賤咸同此制未山陵前朔望設菜食陵墓萬世所宅意嘗恨休安陵未稱今可用東三處地最東邊以葬我名爲景安陵喪禮每存省約不須煩民百官停六時入臨朔望祖日可依舊諸主六宮並不須從山陵內殿風華壽昌耀靈三處是吾所治製夫貴有天下富兼四海宴處寢息不容乃陋謂此爲奢儉之中慎勿壞去顯揚殿玉像諸佛及供養具如別牒可盡心禮拜供養之應有功德事可專在中自今公私皆不得出家爲道及起立塔寺以宅爲精舍並嚴斷之唯年六十必有道心聽朝賢選序已有別詔諸小小賜乞及閤內處分亦有別牒內外禁衛勞舊主帥左右悉付蕭諱兩雍本優量驅使之勿負吾遺意也是日上崩年五十四上剛毅有斷爲治總大體以富國爲先頗不喜遊宴雕綺之事言常恨之未能頓遣臨崩又詔

凡諸遊費宜從休息自今遠近薦獻務存節儉不得出界營求相
高奢麗金粟繪纈弊民已多珠玉玩好傷工尤重嚴加禁絕不得
有違准繩九月丙寅葬景安陵

史臣曰世祖南面嗣業功參寶命雖爲繼體事實艱難御衮垂旒
深存政典文武授任不革舊章明罰厚恩皆由上出義兼長遠莫
不肅然外表無塵內朝多豫機事平理職貢有恆府藏內充民鮮
勞役宮室苑囿未足以傷財安樂延年厭庶所同幸若夫割愛懷
抱同彼甸人太祖羣昭位後諸穆昔漢武留情晚悟追恨戾園魏
文侯克中山不以封弟英賢心迹臣所未詳也

贊曰武帝不顯徽號止戈韶嶺歇禋彭派澄波威承景厯肅御金
科北懷戎款南獻夷歌市朝晏逸中外寧和

南齊書卷四

本紀第四

鬱林王

鬱林王昭業字元尙文惠太子長子也小名法身世祖卽位封南
郡王二千戶永明五年十一月戊子冠於東宮崇政殿其日小會
賜王公以下帛各有差給昭業扶二人七年有司奏給班劔二十
人鼓吹一部高選友學十一年給早輪三望車詔高選國官文惠
太子薨立昭業爲皇太孫居東宮世祖崩太孫卽位八月壬午詔
稱先帝遺詔以護軍將軍武陵王曄爲衛將軍征南大將軍陳顯
達卽本號並開府儀同三司尙書左僕射西昌侯諱北齊本爲尙
書令太孫詹事沈文季爲護軍將軍癸未以司徒竟陵王子良爲
太傅詔曰朕以寡薄嗣膺寶政對越靈命欽若前圖思所以敬守

成規拱揖羣后哀荒在日有愴大猷宜育德振民光昭睿範凡連
三調及眾債在今年七月三十日前悉同蠲除其備償封籍貨鬻
未售亦皆還主御府諸署池田邸冶興廢沿事本施一時於今無
用者詳所罷省公宜權禁一以還民關市征賦務從優減丙戌詔
曰近北掠餘口悉充軍實刑囚無小囚或攸赦撫辜興仁事深宥
範宜從蕩宥許以自新一同放遣還復民籍已賞賜者亦皆爲
贖辛丑詔曰往歲變虜協謀志擾邊服羣帥授略大殲凶醜革城
克捷及舞陰固守二處勞人未有沾爵賞者可分遣選部往彼序
用九月癸丑詔東西二省府國長屯所積財單祿寡良以矜懷選
部可甄才品能推校年月邦守邑丞隨宜量處以貧爲先辛酉追
尊文惠皇太子爲世宗文皇帝冬十月壬寅尊皇太孫太妃爲皇
太后立皇后何氏十一月辛亥立臨汝公昭文爲新安王曲江公

昭秀爲臨海王皇弟昭粲爲永嘉王

隆昌元年春正月丁未改元大赦加太傅竟陵王子良殊禮驍騎將軍晉熙王鈺爲郢州刺史丹陽尹安陸王子敬爲南兖州刺史征北大將軍晉安王子懋爲江州刺史臨海王昭秀爲荊州刺史永嘉王昭粲爲南徐州刺史征南大將軍陳顯達進號車騎大將軍郢州刺史建安王子眞爲護軍將軍詔百僚極陳得失又詔王公以下各舉所知戊申以護軍將軍沈文季爲領軍將軍己酉以前將軍曹虎爲雍州刺史右衛將軍薛淵爲司州刺史庚戌以靈朔將軍蕭懿爲梁南秦二州刺史輔國長史申希祖爲交州刺史辛亥車駕祠南郊詔曰執耜整念懸罄比室秉機或情無褐終年非怠非荒雖由王道不稔不秀實賴民和頃歲多稼無爽遺秉如積而三登之美未臻萬斯之基尙遠且風土異宜百民舛務刑章

治緒未必同源妨本害政事非一揆冕旒屬念無忘夙典可嚴下
州郡務滋耕殖相畝闢疇廣開地利深樹國本克阜天民又詢訪
獄市博聽謠俗傷風損化各以條聞主者詳爲條格戊午車駕拜
景安陵己巳以新除黃門侍郎周奉叔爲青州刺史二月辛卯車
駕祠明堂夏四月辛巳衛將軍開府儀同三司武陵王曄薨戊子
太傅竟陵王子良薨戊戌以前沙州刺史楊旻爲沙州刺史丁酉
以驃騎將軍廬陵王子卿爲衛將軍尙書右僕射鄱陽王鏘爲驃
騎將軍竝開府儀同三司閏月乙丑以南東海太守蕭穎胄爲青
冀二州刺史丁卯鎮軍大將軍諱北雍本
作鸞卽本號開府儀同三司
戊辰以中軍將軍新安王昭文爲揚州刺史六月丙寅以黃門侍
郎王思遠爲廣州刺史秋七月庚戌以中書郎蕭遙欣爲兗州刺
史東莞太守臧靈智爲交州刺史癸巳皇太后令曰鎮軍車騎左

僕射前將軍領軍左衛衛尉八座自我皇庥啟基受終於宋睿聖

繼軌三葉重光太祖以神武創業草昧區夏武皇以英明提極經

緯天人文帝以上哲之資體元良之重雖功未被物而德已在民

三靈之眷方永七百之基已固嗣主特鍾沴氣爰表弱齡險戾著

於綠車愚固彰於崇南雍本正狗馬是好酒色方洒所務唯鄙事

所疾唯善人世祖慈愛曲深每加容掩冀年志稍改立守神器自

入纂鴻業長惡滋甚居喪無一日之哀纒絰爲歡宴之服昏酣長

夜萬機斯壅發號施令莫知所從闕豎徐龍駒專總樞密奉叔珍

之互執權柄自以爲任得其人表裏緝穆邁蕭曹而愈信布倚太

山而坐平原於是恣情肆意罔顧天顯二帝姬嬪並充寵御兩宮

遺服皆納玩府內外混漫男女無別丹屏之北爲酤鬻之所青蒲

之上開桑中之肆又微服潛行信次忘反端委以朝虛位交戟而

守空宮積旬矣宰輔忠賢盡誠奉主誅鋤羣小冀能懷革曾無克
己更深怨憾公卿股肱以異己寘戮文武昭穆以德譽見猜放肆
醜言將行屠膾社稷危殆有過綴旒昔太宗克光於漢世簡文代
興於晉氏前事之不念後人之師也鎮軍居正體道家國是賴伊
霍之舉實寄淵謨便可詳依舊典以禮廢黜中軍將軍新安王體
自文皇睿哲天秀宜入嗣鴻業永寧四海卽以禮奉迎未亾人
屬此多難投筆增慨昭業少美容止好隸書世祖敕皇孫手書不
得妄出以責重之進對音吐甚有令譽王侯五日一問訊世祖嘗
獨呼昭業至幄座別加撫問呼爲法身鍾愛甚重文惠皇太子薨
昭業每臨哭輒號咷不自勝俄爾還內歡笑極樂在世祖喪哭泣
竟入後宮嘗列胡妓二部夾閣迎奏爲南郡王時文惠太子禁其
起居節其用度昭業謂豫章王妃庾氏曰阿婆佛法言有福德生

帝王家今日見作天王便是大罪左右主帥動見拘執不如作市
邊屠酤富兒百倍矣及卽位極意賞賜動百數十萬每見錢輒曰
我昔時思汝一文不得今得用汝未朞年之間世祖齋庫儲錢數
億垂盡開主衣庫與皇后寵姬觀之給閹人豎子各數人隨其所
欲恣意輦取取諸寶器以相剖擊破碎之以爲笑樂居嘗裸袒著
紅縠禪雜彩和服好鬪雞密買雞至數千價世祖御物甘草杖宮
人寸斷用之毀世祖招婉殿乞閹人徐龍駒爲齋龍駒尤親幸爲
後閹舍人日夜在六宮房內昭業與文帝幸姬霍氏淫通龍駒勸
長留宮內聲云度霍氏爲尼以餘人代之嘗以邪詔自進每謂人
曰古時亦有監作三公者皇后亦淫亂齋閹通夜洞開內外淆雜
無復分別中書舍人綦母珍之朱隆之直閹將軍曹道剛周奉叔
竝爲帝羽翼高宗屢諫不納先啟誅龍駒次誅奉叔及珍之帝竝

不能違既而尼媼外入頗傳異語乃疑高宗有異志中書令何肩以皇后從叔見親使直殿省嘗隨后呼肩爲三父與肩謀誅高宗令肩受事肩不敢當依違杜諫帝意復止乃謀出高宗於西州中敕用事不復關諮高宗慮變定謀廢帝二十二日壬辰使蕭諶坦之等於省誅曹道剛朱隆之等率兵自尙書入雲龍門戎服加朱衣於上比入門三失履王晏徐孝嗣蕭坦之陳顯達王廣之沈文季係進帝在壽昌殿聞外有變使閉內殿諸房閣令闔人登輿光樓望還報云見一人戎服從數百人急裝在西鍾樓下須臾蕭諶領兵先入宮截壽昌閣帝走向愛姬徐氏房拔劍自刺不中以帛纏頸輿接出延德殿諶初入殿宿衛將士皆操弓楯欲拒戰諶謂之曰所取自有入卿等不須動宿衛信之及見帝出各欲自奮帝竟無一言出西街弑之時年二十一輿尸出徐龍駒宅殯葬以王

禮餘黨亦見誅

史臣曰鬱林王風華外美眾所同惑伏情隱詐難以覓求立嫡以長未知瑕釁世祖之心不變周道既而訾鄙內作兆自宮闈雖爲害未遠足傾社稷春秋書梁伯之過言其自取亾也

贊曰十訾有一無國不失鬱林負荷棄禮亾律

東西二省府國長屯一本屯字作老疑

南齊書卷五

本紀第五

海陵王

海陵恭王昭文字季尚文惠太子第二子也永明四年封臨汝公
邑千五百戶初爲輔國將軍濟陽太守十年轉持節督南豫州諸
軍事南豫州刺史將軍如故十一年進號冠軍將軍文惠太子薨
還都鬱林王卽位爲中軍將軍領兵置佐封新安王邑二千戶隆
昌元年爲使持節都督揚南徐二州諸軍事揚州刺史將軍如故
其年鬱林王廢尚書令西昌侯諱北齊本議立昭文爲帝延興元
年秋七月丁酉卽皇帝位以尚書令鎮軍大將軍西昌侯諱北齊
本爲驃騎大將軍錄尚書事揚州刺史宣城郡公詔曰太祖高皇
帝英謀光大受命作齊世祖武皇帝宏猷冠世繼暉下武世宗文

皇帝清明懿鑠四海宅心竝德漏下泉功昭上象聲教所覃無思
不洽洪基式固景祚方融而天步多阻運鍾否剝嗣君昏忍暴戾
滋多棄侮天經悖滅人紀朝野重足遐邇側視民怨神恫宗祧如
綴賴忠謨肅舉霄漢廓清俾三后之業絕而更紐七百之慶危而
復安猥以冲人入纂乾緒載懷馭朽若墜諸淵思與黎元共綏戩
福大赦改元文武賜位二等八月甲辰以新除衛尉蕭湛爲中領
軍司空王敬則進位太尉新除車騎大將軍陳顯達爲司空尙書
左僕射王晏爲尙書令左衛將軍王廣之爲豫州刺史驃騎大將
軍鄱陽王鏘爲司徒詔遣大使巡行風俗丁未詔曰新安國五品
以上悉與滿敘自此以下皆聽解遣其欲仕者適其所樂以驍騎
將軍河東王鉉爲南徐州刺史西中郎將臨海王昭季爲車騎將
軍南徐州刺史永嘉王昭粲爲荊州刺史戊申以輔國將軍王詡

爲廣州刺史中書郎蕭遙欣爲兗州刺史庚戌以車騎板行參軍
李慶綜爲寧州刺史辛亥以安西將軍王玄邈爲中護軍新除後
軍司馬蕭誕爲徐州刺史壬子以冠軍司馬臧靈智爲交州刺史
乙卯申明織成金薄綵花錦繡履之禁九月癸酉詔曰頃者以淮
關搖戍勤瘁於行役故覃以榮階薄酬厥勞動狀淹留未集王府
非所以急舍爵之典趣報功之旨便可分遣使部往彼銓用辛巳
以前九真太守宋慈明爲交州刺史癸未誅新除司徒鄱陽王鏘
中軍大將軍隨郡王子隆遣平西將軍王廣之誅南兗州刺史安
陸王子敬於是江州刺史晉安王子懋起兵遣中護軍王玄邈討
之乙未驃騎大將軍諱北雍本假黃鉞內外纂嚴又誅湘州刺史
南平王銳郢州刺史晉熙王鉞南豫州刺史宜都王鏗丁亥以衛
將軍廬陵王子卿爲司徒撫軍將軍桂陽王鑠爲中軍將軍開府

儀同三司冬十月癸巳詔曰周設媒官趣及時之制漢務輕徭在
休息之典所以布德弘教寬俗阜民朕君制八紘志敷九德而習
俗之風爲弊未改靜言多愠無念昏昃督勸婚嫁宜嚴更申明必
使禽幣以時標梅息怨正廚諸役舊出州郡徵吏民以應其數公
獲二旬私累數朔又廣陵年常遞出千人以助淮戍勞擾爲煩抑
亦苞苴是育今竝可長停別量所出諸縣使村長路都防城直縣
爲劇尤深亦宜禁斷丁酉解嚴進驃騎大將軍楊州刺史宣城公
諱比雍本
作鸞爲太傅領大將軍楊州牧加殊禮進爵爲王戊戌誅新
除中軍將軍桂陽王鑠撫軍將軍衡陽王鈞侍中祕書監江夏王
鋒鎮軍將軍建安王子真左將軍巴陵王子倫癸卯以寧朔將軍
蕭遙欣爲豫州刺史新除黃門郎蕭遙昌爲郢州刺史輔國將軍
蕭誕爲司州刺史宣城王輔政帝起居皆諮而後行思食蒸魚蒸

太官令答無錄公命竟不與辛亥皇太后令曰司空後將軍丹陽
尹右僕射中領軍八座夫明晦迭來屯平代有上靈所以睠命億
兆所以歸懷自皇家淳耀列聖繼軌諸侯官方百神受職而殷憂
時啟多難薦臻隆昌失德特紊人鬼非徒四海解體乃亦九鼎將
移賴天縱英輔大匡社稷崩基重造墜典再興嗣王幼冲庶政多
昧且早嬰疴疾弗克負荷所以宗正內侮戚藩外叛覘天視地人
各有心雖二祖之德在民而七廟之危行及自非樹以長君鎮以
淵器未允天人之望寧息奸宄之謀太傅宣城王胤體宣皇鍾慈
太祖識冠生民功高造物符表夙著謳頌有在宜入承寶命式靈
宗祏帝可降封海陵王吾當歸老別館昔宣帝中興漢室簡文重
延晉祀庶我鴻基於茲永固言念家國感慶載懷建武元年詔海
陵王依漢東海王彊故事給虎賁旄頭畫輪車設鍾虞宮縣俱奉

所須每存隆厚十一月稱王有疾數遣御師占視乃殞之給溫明祕器衣一襲斂以衮冕之服大鴻臚監護喪事葬給輜輶車九旒大輅黃屋左纛前後部羽葆鼓吹挽歌二部依東海王故事諡曰恭王年十五

史臣曰郭璞稱永昌之名有二日之象而隆昌之號亦同焉案漢中平六年獻帝卽位便改元爲光熹張讓段珪誅後改元爲昭寧董卓輔政改元爲永漢一歲四號也晉惠帝太安二年長沙王又事改成都王穎改元爲永安穎自鄴奪河閒王顒復改元爲永興一歲三號也隆昌延興建武亦三改年號故知喪亂之軌迹雖千載而必同矣

贊曰穆穆海陵因亾代興不先不後遭命是膺

南齊書卷五 本紀第五

南齊書卷六

本紀第六

明帝

高宗明皇帝諱鸞字景栖始安貞王道生子也小諱玄度少孤太祖撫育恩過諸子宋泰豫元年爲安吉令有嚴能之名補武陵王左常侍不拜元徽二年爲永世令昇明二年爲邵陵王安南記室參軍未拜仍遷寧朔將軍淮南宣城二郡太守尋進號輔國將軍太祖踐阼遷侍中封西昌侯邑千戶建元二年爲持節督郢州司州之義陽諸軍事冠軍將軍郢州刺史進號征虜將軍世祖卽位轉度支尙書領右軍將軍永明元年遷侍中領驍騎將軍王子侯舊乘纏帷車高宗獨乘下帷儀從如素士公事混撓販倉人擔火誤燒牛鼻豫章王白世祖世祖笑焉轉爲散騎常侍左衛將軍清

道而行上甚悅二年出爲征虜將軍吳興太守四年遷中領軍常侍竝如故五年爲持節監豫州郢州之西陽司州之汝南二郡軍事右將軍豫州刺史七年爲尙書右僕射八年加領衛尉十年轉左僕射十二年領右衛將軍世祖遺詔爲侍中尙書令尋加鎮軍將軍給班劔二十人隆昌元年卽本號爲大將軍給鼓吹一部親兵五百人尋又加中書監開府儀同三司鬱林王廢海陵王立爲使持節都督揚南徐二州諸軍事驃騎大將軍錄尙書事揚州刺史開府如故增班劔爲三十人封宣城郡公二千戶鎮東府城給兵五千人錢二百萬布千匹九江作難假黃鉞事靈表送之尋加黃鉞都督中外諸軍事太傅領大將軍揚州牧增班劔爲四十人給幢絡三望車前後部羽葆鼓吹劔履上殿入朝不趨贊拜不名置左右長史司馬從事中郎掾屬各四人封宣城王邑五千戶持

節侍中中書監錄尚書竝如故未拜太后令廢海陵王以上入纂
太祖爲第三子羣臣三請乃受命

建武元年冬十月癸亥卽皇帝位詔曰皇齊受終建極握鏡臨宸
神武重輝欽明懿鑠七百攸長盤石斯固而王度中蹇天階薦阻
嗣命多違蕃釁孔棘宏圖景祿將墜諸淵宣德皇后遠鑒崇替憲
章舊典疇咨台揆允定靈策用集寶命于予一人猥以虛薄纘承
大業仰繫鴻丕顧臨兆民永懷先構若履春冰寅憂夕惕罔識攸
濟思與萬國播此惟新大赦天下改元宿衛身普轉一階其餘文
武賜位二等逋租宿責換負官物在建武元年以前悉原除劫賊
餘口在臺府者可悉原放負釁流徙竝還本鄉太尉王敬則爲大
司馬司空陳顯達爲太尉尚書令王晏加驃騎大將軍中領軍蕭
詵爲領軍將軍南徐州刺史皇子寶義爲揚州刺史中護軍王玄

邈爲南兖州刺史新除右將軍張瓌爲右光祿大夫平北將軍王
廣之爲江州刺史乙丑詔斷遠近上禮丁卯詔自今雕文篆刻歲
時光新可悉停省蕃牧守宰或有薦獻事非任土嚴加禁斷追贈
安陸昭侯緬爲安陸王己巳以安陸侯子寶暉爲湘州刺史詔曰
頃守職之吏多違舊典存私害公實興民蠹今商旅稅石頭後渚
及夫鹵借倩一皆停息所在凡厥公宜可卽符斷主曹詳爲其制
憲司明加聽察十一月癸酉以西中郎長史始安王遙光爲揚州
刺史晉壽太守王洪範爲青冀二州刺史尙書令王晏領太子少
傅甲戌大司馬尋陽公王敬則等十三人進爵邑各有差詔省新
林苑先是民地悉以還主原責本直庚辰立皇子寶義爲晉安王
寶玄爲江夏王寶源爲廬陵王寶夤爲建安王諱北雍本作寶融爲隨郡
王寶攸爲南平王甲申詔曰邑宰祿薄俸微不足代耕雖任土恆

貢亦爲勞費自今悉斷又詔宣城國五品以上悉與滿敘自此以下皆聽解遣其欲仕適所樂乙酉追尊始安貞王爲景皇妃爲懿后丙戌以輔國將軍聞喜公遙欣爲荊州刺史寧朔將軍豐城公遙昌爲豫州刺史丁亥詔細作中署材官車府凡諸工可悉開番假遞令休息戊子立皇太子寶卷賜天下爲父後者爵一級孝子順孫義夫節婦普加甄衡明揚表其衡閭賚以束帛己丑詔東宮肇建遠近或有慶禮可悉斷之壬辰以新除征虜將軍江夏王寶立爲郢州刺史永明中御史中丞沈淵表百官年登七十皆令致仕竝窮困私門庚子詔曰日者百司耆齒許以自陳東西二省猶沾微俸辭事私庭榮祿兼謝興言愛老實有矜懷自縉紳年及可一遵永明七年以前銓敘之科上輔政所誅諸王是月復屬籍各封子爲侯十二月壬子詔日上覽易遺下情難達是以甘棠見美

肺石流詠自月一視黃辭如有含枉不申懷直未舉者莅民之司
竝任厥失

二年春正月辛未詔京師繫囚殊死可降爲五歲刑三署見徒五
歲以下悉原赦王公以下各舉所知隨王公卿士內外羣僚各舉
朕違肆心極諫索虜寇司豫徐梁四州壬申遣鎮南將軍王廣之
督司州征討右衛將軍蕭坦之督徐州征討尚書右僕射沈文季
督豫州征討己卯詔京師二縣有毀發墳壠隨宜脩理又詔曰食
惟民天義高姬載蠶實生本教重軒經前哲盛範後王茂則布令
審端咸必由之朕肅展巖廊思引風訓深務八政永鑒在勤靜言
日昃無怠寢興守宰親民之主牧伯調俗之司宜嚴課農桑固令
游惰揆景肆力必窮地利固脩堤防考校殿最若耕蠶殊眾具以
名聞游怠害業卽便列奏主者詳爲條格乙未虜攻鍾離徐州刺

史蕭惠休破之丙申加太尉陳顯達使持節都督西北征討諸軍
事丁酉內外纂嚴三月戊申詔南徐州僑舊民丁多充戎旅蠲今
年三課已未司州刺史蕭懿與眾軍擊虜破之詔雍豫司南兗徐
五州遇寇之家悉停今年稅調其與虜交通不問往罪丙寅停青
州麥租虜自壽春退走甲申解嚴夏四月己亥朔三百里內獄訟
同集京師剋日聽覽此以外委州郡訊察三署徒隸原遣有差索
虜圍漢中梁州刺史蕭懿拒退之己未以新除黃門郎裴叔業爲
徐州刺史五月甲午寢廟成詔監作長帥可賜位一等役身遣假
一年非役者蠲租同假限六月壬戌誅領軍將軍蕭坦之爲領軍將
明南海王子罕邵陵王子貞乙丑以右衛將軍蕭坦之爲領軍將
軍秋七月辛未以右將軍晉安王寶義爲南徐州刺史壬申以冠
軍將軍梁王爲司州刺史辛卯以氏楊馥之爲北秦州刺史仇池

公八月丁未以右衛將軍廬陵王寶源爲南兗州刺史庚戌以新
除輔國將軍申希祖爲兗州刺史九月己丑改封南平王寶攸爲
邵陵王蜀郡王子文爲西陽王廣漢王子峻爲衡陽王臨海王昭
秀爲巴陵王永嘉王昭粲爲桂陽王冬十月丁卯詔曰軌世去奢
事殷哲后訓物以儉理鏡前王朕屬流弊之末襲澆淳之季雖恭
已弘化刻意隆平而禮讓未興侈華猶競永覽玄風兢言集愧思
所以還淳改俗反古移民可罷東田毀興光樓并詔水衡量省御
乘乙卯納皇太子妃褚氏大赦王公已下班賜各有差斷四方上
禮十二月丁酉詔曰舊國都邑望之悵然況乃自經南面負宸宸
居或功濟當時德覃一世而塋壠攢穢封樹不脩豈直嗟深牧豎
悲甚信陵而已哉昔中京淪覆鼎玉東遷晉元締構之始簡文遺
詠在民而松門夷替埏路榛蕪雖年代殊往撫事興懷晉帝諸陵

悉加脩理并增守衛吳晉陵二郡失稔之鄉蠲三調有差

三年春正月丁酉以陰平王楊昺子崇祖爲沙州刺史封陰平王
北中郎將建安王寶夤爲江州刺史己巳詔申明守長六周之制
乙酉詔去歲索虜寇邊緣邊諸州郡將士有臨陣及疾病死亾者
竝送還本土三月壬午詔車府乘輿有金銀飾校者皆剔除夏四
月虜寇司州戍兵擊破之五月己巳以征虜將軍蕭懿爲益州刺
史前軍將軍陰廣宗爲梁南秦二州刺史前新除寧州刺史李慶
宗爲寧州刺史秋九月辛酉以冠軍將軍徐玄慶爲兗州刺史冬
十月以輔國將軍申希祖爲司州刺史閏十二月戊寅皇太子冠
賜王公以下帛各有差爲父後者賜爵一級斷遠近上禮又詔今
歲不須光新可以見錢爲百官供給

四年春正月庚午大赦詔曰嘉肴停俎定方旨於必甘良玉在政

表珪璋於既就是以陶鈞萬品務本爲先經緯九區學數爲大往
因時康崇建庠序屯虞薦有權從省廢謳誦寂寥倏移年稔永言
古昔無忘旰昃今華夏乂安要荒慕嚮締修東序寔允適待便可
式依舊章廣延國胄弘敷景業光被後昆壬寅詔民產子者蠲其
父母調役一年又賜米十斛新婚者蠲夫役一年丙辰尙書令王
晏伏誅二月甲子以左僕射徐孝嗣爲尙書令征虜將軍蕭季敞
爲廣州刺史三月乙未右僕射沈文季領護軍將軍秋八月追尊
景皇所生王氏爲恭太后索虜寇河北冬十月又寇司州甲戌遣
太子中庶子梁王右軍司馬張稷討之十一月丙辰以氏楊靈珍
爲北秦州刺史仇池公武都王丁亥詔所在結課屋宅田桑可詳
減舊價十二月甲子以冠軍將軍裴叔業爲豫州刺史冠軍將軍
徐玄慶爲徐州刺史寧朔將軍左興盛爲兗州刺史丁丑遣度支

尙書崔慧景率眾救雍州

永泰元年春正月癸未朔大赦逋租宿債在四年之前皆悉原除
中軍大將軍徐孝嗣卽本號開府儀同三司河北諸郡爲虜所侵
相繼敗沒乙巳遣太尉陳顯達持節救雍州丁未誅河東王鉉臨
賀王子岳西陽王子文衡陽王子峻南康王子琳永陽王子珉湘
東王子建南郡王子夏桂陽王昭粲巴陵王昭秀二月癸丑遣左
衛將軍蕭惠休假節援壽陽辛未豫州刺史裴叔業擊虜於淮北
破之辛巳平西將軍蕭遙欣領雍州刺史三月丙午蠲雍州遇虜
之縣租布戍申詔曰仲尼明聖在躬允光上哲弘厥雅道大訓生
民師範百王軌儀千載立人斯仰忠孝攸出立功潛被至德彌闡
雖反袂遐曠而祀薦靡闕時祭舊品秩比諸侯須歲以來祀典陵
替俎豆寂寥牲奠莫舉豈所以克昭盛烈永隆風教者哉可式循

舊典詳復祭秩使牢餼備禮欽饗兼申夏四月甲寅改元赦三署
四繫原除各有差文武賜位二等丙戌以鎮軍將軍蕭坦之爲侍
中中領軍己未立武陵昭王子子坦之爲衡陽王丙寅以西中郎長
史劉暄爲郢州刺史丁卯大司馬會稽太守王敬則舉兵反五月
壬午遣輔國將軍劉山陽率軍東討乙酉斬敬則傳首曲赦浙東
吳晉陵七郡以後軍長史蕭穎胄爲南兖州刺史丁酉以北中郎
將司馬元和爲兖州刺史秋七月以輔國將軍王珍國爲青冀二
州刺史癸卯以太子中庶子梁王爲雍州刺史太尉陳顯達爲江
州刺史己酉帝崩于正福殿年四十七遺詔曰徐令可重申八命
中書監本官悉如故沈文季可左僕射常侍護軍如故江祏可右
僕射江祀可侍中劉暄可衛尉軍政大事委陳太尉內外眾事無
大小委徐孝嗣遙光坦之江福其大事與沈文季江祀劉暄參懷

心膂之任可委劉峻蕭惠休崔慧景葬興安陵帝明審有吏才持
法無所借制御親幸臣下肅清驅使寒人不得用四幅繖大存儉
約罷世祖所起新林苑以地還百姓廢文帝所起太子東田斥賣
之永明中輿輦舟乘悉剔取金銀還主衣庫太官進御食有裏蒸
帝曰我食此不盡可四片破之餘充晚食而世祖掖庭中宮殿服
御一無所改性猜忌多慮故亟行誅戮潛信道術用計數出行幸
先占利害南出則唱云西行東遊則唱云北幸簡於出入竟不南
郊上初有疾無輟聽覽祕而不傳及寢疾甚久勅臺省府署六簿
求白魚以爲治南雍本
作藥外始知之身衣絳衣服飾皆赤以爲厭勝
巫覡云後湖水頭經過宮內致帝有疾帝乃自至太官行水溝左
右啟太官若無此水則不立帝決意塞之欲南引淮流會崩事寢
史臣曰高宗以支庶纂麻據猶子而爲論一朝到此誠非素心遺

寄所當諒不獲免夫戕夷之事懷抱多端或出自雄忍或生乎畏
懾今同財之親在我而先棄進引之愛量物其必遠疑怯既深猜
似外入流涕行誅非云義舉事苟求安能無內愧既而自樹本根
枝盾孤弱貽厥不昌終覆宗社若令壓鈕之徵必委天命盤庚之
祀亦繼陽甲杖運推公夫何譏爾

贊曰高宗傍起宗國之慶慕名儉德垂文法令兢兢小心察察吏
政沔陽失土南風不競

南齊書卷七

本紀第七

東昏侯

東昏侯寶卷字智藏高宗第二子也本名明賢高宗輔政後改焉
建武元年立爲皇太子永泰元年七月己酉高宗崩太子卽位八
月丁巳詔雍州將士與虜戰死者復除有差又詔辨括選序訪搜
貧屈庚申鎮北將軍晉安王寶義進號征北大將軍開府儀同三
司南中郎將建安王寶夤爲郢州刺史冬十月己未詔刪省科律
十一月戊子立皇后褚氏賜王公以下錢各有差

永元元年春正月戊寅大赦改元詔研策秀孝

兩雍本並作才

考課百司

辛卯車駕祠南郊詔三品清資官以上應會祿者有二親或祖父

母年登七十並給見錢癸卯以冠軍將軍南康王諱

北雍本作寶融

爲荆

州刺史二月癸丑以北中郎將邵陵王寶攸爲南兖州刺史是月
太尉陳顯達敗績於馬圈夏四月己巳立皇太子誦大赦賜民爲
父後爵一級甲戌以寧朔將軍柳惔爲梁南秦二州刺史五月癸
亥以撫軍大將軍始安王遙光爲開府儀同三司六月己酉新除
右衛將軍崔慧景爲護軍將軍癸亥以始興內史范雲爲廣州刺
史甲子詔原雍州今年三調秋七月丁亥京師大水死者眾詔賜
死者材器并賑卹八月乙巳蠲京邑遇水資財漂蕩者今年調稅
又詔爲馬圈戰亡將士舉哀丙午揚州刺史始安王遙光據東府
反詔曲赦京邑中外戒嚴尙書令徐孝嗣以下屯衛宮城遣領軍
將軍蕭坦之率六軍討之戊午斬遙光傳首己未以征北大將軍
晉安王寶玄爲南徐兖二州刺史己巳尙書令徐孝嗣爲司空右
衛將軍劉暄爲領軍將軍閏月丙子以江陵公寶覽爲始安王虜

僞東徐州刺史沈陵降以爲北徐州刺史九月丁未以輔國將軍
裴叔業爲兗州刺史征虜長史張沖爲豫州刺史壬戌以頻誅大
臣大赦天下辛未以太子詹事王瑩爲中領軍冬十月乙未誅尙
書令新除司空徐孝嗣右僕射新除鎮軍將軍沈文季乙巳以始
興內史顏翻爲廣州刺史征虜將軍沈陵爲越州刺史十一月丙
辰太尉江州刺史陳顯達舉兵於尋陽乙丑護軍將軍崔慧景加
平南將軍督眾軍南討事丙寅以冠軍將軍王鴻爲徐州刺史十
二月癸未以前輔國將軍楊集始爲秦州刺史甲申陳顯達至京
師宮城嚴警六軍固守乙酉斬陳顯達傳首丁亥以征虜將軍邵
陵王寶攸爲江州刺史

二年春正月壬子以輔國將軍張沖爲南兗州刺史庚午詔討豫
州刺史裴叔業二月癸未以黃門郎蕭寅爲司州刺史丙戌以衛

尉蕭懿爲豫州刺史征壽春己丑裴叔業病死兄子植以壽春降虜三月癸卯以輔國將軍張沖爲司州刺史乙卯遣平西將軍崔慧景率眾軍伐壽春夏四月丁未以新除冠軍將軍張沖爲南兗州刺史崔慧景於廣陵舉兵襲京師壬子右衛將軍左興盛督京邑水步眾軍南徐州刺史江夏王寶玄以京城納慧景乙卯遣中領軍王瑩率眾軍屯北籬門壬戌慧景至瑩等敗績甲子慧景入京師宮內據城拒守豫州刺史蕭懿起義救援癸酉慧景棄眾走斬首詔曲赦京邑南徐兖二州乙亥以新除尙書右僕射蕭懿爲尙書令丙子以晉熙王寶嵩爲南徐州刺史五月乙巳以虜僞豫州刺史王肅爲豫州刺史戊申以桂陽王寶貞爲中護軍己酉江夏王寶玄伏誅壬子大赦乙丑曲赦京邑南徐兖二州戊辰以始安王寶覽爲湘州刺史六月庚寅車駕於樂遊苑內會如三元京

邑女人放觀戍戍以新除冠軍將軍張沖爲郢州刺史守五兵尙書陸慧曉爲南兖州刺史秋七月甲辰以驃騎司馬張穆爲北徐州刺史八月丁酉以新除驃騎司馬陳伯之爲豫州刺史甲申夜宮內火冬十月己卯害尙書令蕭懿十一月辛丑以寧朔將軍張穆爲南兖州刺史甲寅西中郎長史蕭穎胄起義兵於荊州十二月雍州刺史梁王起義兵於襄陽戊寅以冠軍長史劉繪爲雍州刺史

三年春正月丙申朔合朔時加寅漏上八刻事畢宮人於闕武堂元會皇后正位闈人行儀帝戎服臨視丁酉以驃騎大將軍晉安王寶義爲司徒新除撫軍將軍建安王寶寅爲車騎將軍開府儀同三司甲辰以寧朔將軍王珍國爲北徐州刺史辛亥車駕祠南郊詔大赦天下百官陳讜言二月丙寅乾和殿西廂火壬午詔遣

羽林兵征雍州中外纂嚴乙酉以威烈將軍胡元進爲廣州刺史

三月己亥以驃騎將軍沈徽孚爲廣州刺史甲辰以輔國將軍張

欣泰爲雍州刺史丁未南康王諱

北雍本
作寶融

卽皇帝位於江陵癸丑

遣平西將軍陳伯之西征六月京邑雨水遣中書舍人二縣官長

賑賜有差蕭穎胄弟穎孳起兵廬陵戊子曲赦江州安成廬陵二

郡秋七月癸巳曲赦荆雍二州甲午雍州刺史張欣泰前南譙太

守王靈秀率石頭文武奉建安王寶寅向臺至杜姥宅宮門閉乃

散走己未以征虜長史程茂爲郢州刺史驍騎將軍薛元嗣爲雍

州刺史是日元嗣以郢州降義師八月丁卯以輔國將軍申胄監

豫州事辛巳光祿大夫張瓌鎮石頭辛未以太子左率李居士總

督西討諸軍事屯新亭城九月甲辰以居士爲江州刺史新除冠

軍將軍王珍國爲雍州刺史車騎將軍建安王寶寅爲荊州刺史

以輔國將軍申胄監郢州龍驤將軍馬仙琕監豫州驍騎將軍徐元稱監徐州是日義軍至南州申胄軍二萬人於姑熟奔歸戊申以後軍參軍蕭瑣爲司州刺史前輔國將軍魯休烈爲益州刺史輔國長史趙越嘗爲梁南秦二州刺史丙辰李居士與義軍戰於新亭敗績冬十月甲戌王珍國與義軍戰於朱雀桁敗績戊寅朔將軍徐元瑜以東府城降青冀二州刺史桓和入衛屯東宮己卯眾降光祿大夫張瓌棄石頭還宮於是閉宮城門自守庚辰以驍騎將軍胡虎牙爲徐州刺史左軍將軍徐智勇爲益州刺史游擊將軍牛半爲梁南秦二州刺史李居士以新亭降琅邪城主張木亦降義帥築長圍守宮城十二月丙寅新除雍州刺史王珍國侍中張稷率兵入殿廢帝時年十九帝在東宮便好弄不喜書學高宗亦不以爲非但勸以家人之行令太子求一日再入朝發詔

不許使三日一朝嘗夜捕鼠達旦以爲笑樂高宗臨崩屬以後事以隆昌爲戒曰作事不可在人後故委任羣小誅諸宰臣無不如意性重澀少言不與朝士接唯親信閹人及左右御刀應敕等自江祚始安王遙光誅後漸便騎馬日夜於後堂戲馬與親近閹人娼伎鼓叫常以五更就臥至晡乃起王侯節朔朝見晡後方前或際闈遣出臺閣案奏月數十日乃報或不知所在二年元會會後方出朝賀裁竟便還殿西序寢自己至申百僚陪位皆僵仆菜色比起就會恩遽而罷陳顯達事平漸出遊走所經道路屏逐居民從萬春門由東宮以東至於郊外數十里皆空家盡室巷陌懸幔爲高障置伎人防守謂之屏除或於市肆左側過親幸家環回宛轉周遍京邑每三四更中鼓聲四出幡戟橫路百姓喧走相隨士庶莫辨出輒不言定所東西南北無處不驅人高障之內設部伍

羽儀復有數部皆奏鼓吹羌胡伎鼓角橫吹夜出晝反火光照天
拜愛姬潘氏爲貴妃乘臥輿帝騎馬從後著織成袴褶金簿帽執
七寶縛稍戎服急裝不變寒暑陵冒雨雪不避坑穽馳騁渴乏輒
下馬解取腰邊蠡器酌水飲之復上馬馳去馬乘具用錦繡處患
爲雨所沾溼織雜綵珠爲覆蒙備諸雕巧教黃門五六十人爲騎
客又選無賴小人善走者爲逐馬左右五百人常以自隨奔走往
來略不暇息置射雉場二百九十六處翳中帷帳及步鄣皆袷以
綠紅錦金銀鏤弩牙瑇瑁帖箭郊郭四民皆廢業樵蘇路斷吉凶
失時乳婦婚姻之家移產寄室或輿病棄屍不得殯葬有棄病人
於青溪邊者吏懼爲監司所問推置水中泥覆其面須臾便死遂
失骸骨後宮遭火之後更起仙華神仙玉壽諸殿刻畫雕綵青葢
金口帶麝香塗壁錦幔珠簾窮極綺麗繫役工匠自夜達曉猶不

副速乃剔取諸寺佛刹殿藻井仙人騎獸以充足之世祖興光樓上施青漆世謂之青樓帝曰武帝不巧何不純用琉璃潘氏服御極選珍寶主衣庫舊物不復周用貴市民閒金銀寶物價皆數倍虎魄釧一隻直百七十萬京邑酒租皆折使輸金以爲金塗猶不能足下楊南徐二州橋桁塘埭丁計功爲直斂取見錢供太樂主衣雜費由是所在塘瀆多有隳廢又訂出雉頭鶴氅白鷺縷親幸小人因緣爲姦利課一輸十郡縣無敢言者三年夏於闕武堂起芳樂苑山石皆塗以五采跨池水立紫閣諸樓觀壁上畫男女私褻之像種好樹美竹天時盛暑未及經日使就萎枯於是徵求民家望樹便取毀徹牆屋以移致之朝栽暮拔道路相繼花藥雜草亦復皆然又於苑中立市太官每日進酒肉雜肴使宮人屠酷潘氏爲市令帝爲市魁執罰爭者就潘氏決判帝有膂力能擔白虎

幢自製雜色錦伎衣綴以金花玉鏡眾寶逞諸意態所寵羣小黨
與三十一人黃門十人初任新蔡人徐世檟爲直閣驍騎將軍凡
有殺戮皆其用命殺徐孝嗣後封爲臨汝縣子陳顯達事起加輔
國將軍雖用護軍崔慧景爲都督而兵權實在世檟及事平世檟
謂人曰五百人軍主能平萬人都督世檟亦知帝昏縱密謂其黨
茹法珍梅蟲兒曰何世天子無要人但阿儂貨主惡耳法珍等爭
權以白帝帝稍惡其凶強以二年正月遣禁兵殺之世檟拒戰而
死自是法珍蟲兒用事竝爲外監口稱詔敕中書舍人王暄之與
相脣齒專掌文翰其餘二十餘人皆有勢力崔慧景平後法珍封
餘干縣男蟲兒封竟陵縣男及義師起江郢二鎮已降帝遊騁如
舊謂茹法珍曰須來至白門前當一決義師至近郊乃聚兵爲固
守之計召王侯朝貴分置尙書都座及殿省又信鬼神崔慧景事

時拜蔣子文神爲假黃鉞使持節相國太宰大將軍錄尚書揚州
牧鍾山王至是又尊爲皇帝迎神像及諸廟雜神皆入後堂使所
親巫朱光尙禱祀祈福以冠軍將軍王珍國領萬人據大桁莫有
鬪志遣左右直長闔豎王寶孫督戰呼爲王長子寶孫切罵諸將
帥直閤將軍席豪發憤突陣死豪驍將旣斃眾軍於是土崩軍人
從朱雀觀上自投及赴淮死者無數於是閉城自守城內軍事委
王珍國兗州刺史張稷入衛京師以稷爲副實甲猶七萬人帝烏
帽袴褶備羽儀登南掖門臨望又虛設鎧馬齊仗千人皆張弓拔
白出東掖門稱蔣王出盪素好鬪軍隊初使宮人爲軍後乃用黃
門親自臨陳詐被創使人輿將去至是於閱武堂設牙門軍頓每
夜嚴警帝於殿內騎馬從鳳莊門入徽明門馬被銀蓮葉具裝鎧
雜羽孔翠寄生逐馬左右衛從晝眠夜起如平常聞外鼓叫聲被

大紅袍登景陽樓屋上望弩幾中之眾皆怠怨不爲致力募兵出戰出城門數十步皆坐甲而歸慮城外有伏兵乃燒城傍諸府署六門之內皆蕩盡城中閣道西掖門內相聚爲市販死牛馬肉帝初與羣小計議陳顯達一戰便敗崔慧景圍城退走謂義師遠來不過旬日亦應散去敕太官辦樵米爲百日糧而已大桁敗後眾情兇懼法珍等恐人眾驚走故閉城不復出軍旣而義師長圍旣立塹柵嚴固然後出盪屢戰不捷帝尤惜金錢不肯賞賜法珍叩頭請之帝曰賊來獨取我邪何爲就我求物後堂儲數百具榜啟爲城防帝云擬作殿竟不與又催御府細作三百人精仗待圍解以擬屏除金銀雕鏤雜物倍急於常王珍國張稷懼禍及率兵入殿分軍又從西上閣入後宮斷之御刀豐勇之爲內應是夜帝在含德殿吹笙歌作女兒子臥未熟聞兵入趨出北戶欲還後宮清

曜閣已閉闔人禁防黃泰平以刀傷其膝仆地顧曰奴反邪直後
張齊斬首送梁王宣德太后令曰皇室受終祖宗齊聖太祖高皇
帝肇基駿命膺籙受圖世祖武皇帝係明下武高宗明皇帝重隆
景業咸降年不永宮車係北雅本晏皇祚之重允屬儲元而稟質
凶愚發于稚齒爰自保姆迄至成童忍戾昏頑觸途必著高宗留
心正嫡立嫡惟長輔以羣才閑以賢戚內外維持冀免多難未及
暮稔便逞屠戮密戚近親元勳良輔覆族殲門旬月相係凡所任
杖盡慝窮姦皆營伍屠販容狀險醜身秉朝權手斷國命誅戮無
辜納其財產睚眦之間屠覆比屋身居元首好是賤事危冠短服
坐臥以之晨出夜反無復已極驅斥氓庶巷無居人老細奔遑寘
身無所東邁西屏北出南驅負疾輿屍填街塞陌興築繕造日夜
不窮晨構夕毀朝穿暮塞絡以隨珠方斯已陋飾以璧璫曾何足

道時暑赫曦流金鑠石移竹藝果匪日伊夜根未及植葉已先枯

畚鍤紛紜勤倦無已散費國儲專事浮飾逼奪民財自近及遠兆

庶恇恇流穴

北雍本
作窟

道路府帑旣竭肆奪市道工商稗販行號道

泣屈此萬乘躬自角抵昂首翹肩逞能撞木觀者如堵曾無忤容

芳樂華林竝立闐闐踞肆鼓刀手銓輕重干戈鼓譟昏曉靡息無

戎而城豈足云警至於居喪淫讌之愆三年載弄之醜反道違常

之釁牝雞晨鳴之隱於事已細故可得而略也罄楚越之竹未足

以言校辛癸之君豈或能匹征東將軍忠武奮發投袂萬里光奉

明聖翊成中興乘勝席卷掃清京邑而羣小靡識嬰城自固緩戮

稽誅倏彌旬月宜速勦定寧我邦家可潛遣閒介密宣此旨忠勇

齊奮過加蕩撲放斥昏凶衛送外第未亾人不幸驟此百罹感念

存沒心焉如割柰何柰何又令依漢海昏侯故事追封東昏侯茹

法珍梅蟲兒王咍之等伏誅豐勇之原死

史臣曰漢宣帝時南郡獲白虎獲之者張武言武張而猛服也東昏侯亾德橫流道歸拯亂躬當翦戮實啟太平推闡豎之名字亦天意也

贊曰東昏慢道匹癸方辛乃隳典則乃棄彝倫玩習兵火終用焚身

南齊書卷八

本紀第八

和帝

和帝諱寶融字智昭高宗第八子也建武元年封隨郡王邑二千戶三年爲冠軍將軍領石頭戍軍事永元元年改封南康王爲持節督荆雍益寧梁南北秦七州軍事西中郎將荊州刺史二年十一月甲寅長史蕭穎胄殺輔國將軍巴西梓潼二郡太守劉山陽奉梁王舉義乙卯敎纂嚴又敎曰吾躬率晉陽翦此凶孽戎事方勤宜覃澤惠所領內繫囚見徒罪無輕重殊死已下皆原遣先有位署卽復本職將吏轉一階從征身有家口停鎮給廩食凡諸雜役見在諸軍帶甲之身克定之後悉免爲民其功效賞報別有科條丙辰以雍州刺史梁王爲使持節都督前鋒諸軍事左將軍丁

已以蕭穎胄爲右將軍都督行留諸軍事戊午梁王上表勸進十
二月乙亥羣僚勸進竝不許壬辰驍騎將軍夏侯亶自京師至江
陵稱宣德太后令西中郎將南康王宜纂承皇祚光臨億兆方俟
清宮未卽大號可且封宣城南瑱邪南東海東陽臨海新安尋陽
南郡竟陵宜都十郡爲宣城王相國荊州牧加黃鉞置僚屬選百
官西中郎府南康國竝如故須軍次近路主者詳依舊典法駕奉
迎三年正月乙巳王受命大赦唯梅蟲兒茹法珍等不在赦例右
將軍蕭穎胄爲左長史進號鎮軍將軍朶王進號征東將軍甲戌
以冠軍將軍楊公則爲湘州刺史甲寅建牙于城南二月乙丑以
冠軍長史王茂先爲江州刺史冠軍將軍曹景宗爲郢州刺史右
將軍邵陵王寶攸爲荊州刺史己巳羣僚上尊號立宗廟及南北
郊甲申梁王率大眾屯沔口郢州刺史張沖拒守三月酉張沖

死驃騎將軍薛元嗣等固城

南雍本
作固守

中興元年春三月乙巳卽皇帝位大赦改元文武賜位二等錄寡
孤獨不能自存者穀人五斛卽永元三年也以相國左長史蕭穎
胄爲尙書令晉安王寶義爲司空廬陵王寶源爲車騎將軍開府
儀同三司建安王寶寅爲徐州刺史散騎常侍夏侯詳爲中領軍
領軍將軍蕭偉爲雍州刺史丙午有司奏封庶人寶卷爲零陽侯
詔不許又奏爲涪陵王詔可乙酉尙書令蕭穎胄行荊州刺史假
梁王黃鉞壬子以征虜將軍柳惔爲益寧二州刺史己未以冠軍
將軍莊巨黑爲梁南秦二州刺史冠軍將軍鄧元起爲廣州刺史
夏四月戊辰詔曰荆雍義舉所基實始王迹君子勞心細人盡力
宜加酬獎副其乃誠凡東討賊軍及諸嚮義之眾可普復除五月
乙卯車駕幸竹林寺禪房宴羣臣巴西太守魯休烈巴東太守蕭

惠訓子瓚拒義軍秋七月東軍主吳子陽十二軍救郢州屯加湖
丁酉征虜將軍王茂先擊破之辛亥以茂先爲中護軍丁卯魯山
城主孫樂祖以城降己未郢城主薛元嗣降八月丙子平西將軍
陳伯之降乙卯以伯之爲江州刺史子虎牙爲徐州刺史九月乙
未詔梁王若定京邑得以便宜從事冬十一月乙未以輔國將軍
李元履爲豫州刺史壬寅尙書令鎮軍將軍蕭穎胄卒以黃門郎
蕭澹行荊州府州事丁巳蕭瓚魯休烈降十二月丙寅建康城平
己巳皇太后令以梁王爲大司馬錄尙書事驃騎大將軍楊州刺
史封建安郡公依晉武陵王遵承制故事百僚致敬壬申改封建
安王寶寅鄱陽王癸酉以司徒揚州刺史晉安王寶義爲太尉領
司徒甲戌給大司馬錢二千萬布絹各五千匹乙酉以輔國將軍
蕭宏爲中護軍

二年春正月戊戌宣德太后臨朝入居內殿大司馬梁王解承制
致敬如先己亥以寧朔將軍蕭曷監南兗州壬寅以大司馬都督
中外諸軍事加殊禮己酉以大司馬長史王亮爲守尙書令甲寅
詔大司馬梁王進位相國總百揆揚州牧封十郡爲梁公備九錫
之禮加遠遊冠位在諸王上加相國綠綬綬己未以新除右將軍
曹景宗爲郢州刺史二月壬戌湘東王寶暉伏誅戊辰詔進梁公
爵爲梁王增封十郡三月乙未皇太后令給梁國錢五百萬布五
千匹絹千匹辛丑鄱陽王寶寅奔虜邵陵王寶攸晉熙王寶暉桂
陽王寶貞伏誅甲午命梁王冕十二旒建天子旌旗出警入蹕乘
金根駕六馬備五時副車置旄頭雲罕樂舞八佾設鍾簾宮懸王
子王女爵命一如舊儀庚戌以冠軍長史蕭秀爲南徐州刺史新
除中領軍蔡道恭爲司州刺史車駕東歸至姑熟丙辰禪位梁王

丁巳廬陵王寶源薨夏四月辛酉禪詔至皇太后遜外宮丁卯梁
王奉帝爲巴陵王宮于姑熟行齊正朔一如故事戊辰薨年十五
追尊爲齊和帝葬恭安陵

史臣曰夏以桀亾殷隨紂滅郊天改朔理無延世而皇符所集重
興西楚神器蹶來雖有冥數徽名大號斯爲幸矣
贊曰和帝晚隆掃難清宮達機覩運高頌永終